



忠烈錄 中

又 7
4094
2



伊文門
4094
2-2

金原河後水
金原海後水
嗚呼哀哉
存三十年
保矣



忠烈錄卷之五

傳箋

傳朴希賢撰

將軍姓金名應河字景義江原道鐵原人也癸巳兵
荒之歲父母俱歿將軍年甫成童葬埋以禮追慕不
已與其少弱弟應海相依為命孝友之行一邑稱之
稍長以射獵為事且力田自養壬寅年夏觀察使朴
公承宗巡到鐵原府大集材勇之士而試射之將軍
在其中特出朴大奇之勸習武藝越三年乙巳中武
舉成北邊及瓜而還未霑一命恂恂無意於仕進丁



未秋朴判兵曹始除宣傳官至明年戊申夏有不喜者汰將軍職將軍即日歸家略無愠意己酉春朴出按湖南遂以軍官從焉時丁 國恤朴申飭所管勿近酒色帳下諸人鮮能體行而獨將軍律已謹嚴不踰繩墨雖學古書生不如也晝習騎射夜讀兵書未嘗有怠惰之氣其奮勵自期不淺淺朴益愛重之歲庚戌再授宣傳官武將李時言薦于都體察使李公恆福超授慶源判官將行有人來言有貴家女少而艷吾欲爲媒君可卜以爲妾將軍嘿然歎曰吾家素貧貴家女畜之不易置於妻右則名分紊矣遇之以

妾則彼必憾矣凡人福分有限豈可緣妾致貴辭之在慶源秩滿將還觀察使韓浚謙誤注下考仍置幕下及韓公廢出郊外將軍先人往慰或問曰韓於君有何恩德乃如是乎答曰將卒情分在我難恕殿最往事何至介懷聞者歎其義而服其量及朴再判西銓首除都摠經歷仍補三水郡守未久又啓請除北虞候在本道首尾四年清謹自厲勤幹奉職夷民悅服焉節度使使之監築府城晝夜親董旬月工訖口不言功綽有古名將風丁己夏遞來于京戊午五月會葬凝原君子高陽時自內遣中使護喪有人勸將

軍接待曰中官見君好身手必將名徹九重將軍感然不肯曰有所希冀而待之則豈是士夫事乎座客咸異之是秋建虜犯順 天朝徵兵將軍以助防將仍授宣川郡守語其才勇則當爲大帥而做一守令何足展其志乎將軍亦知牽掣願於北道獨當一面其時廟堂不加意遂赴關西隸副元帥金景瑞標下其弟應海欲隨往相救將軍以爲兄弟俱死無益力止之臨發與其家人永訣處置後事封識印信授郡吏曰遇賊我必戰死不可佩往云又嘗致書于朴託其男女婚嫁其素定死綏之志可傷也已巳未二月

二十一日隨都元帥姜弘立領軍渡江而西二月初四日 天朝大將劉都督統率三萬餘兵到虜地富車嶺相繼敗績我軍左右營亦從而覆沒時左營千摠申忠業從陣上逃還昌州傳其戰敗之由旣而中營砲手金忠男出身韓忠立教師慎奇男韓弘世等及他走回人次第來京言將軍終始力戰之狀如出一人口四月初二日被虜兩帥送鄭應井等來傳諸胡皆言左營中有一將終始力戰依於一樹手劒擊殺不可勝記身被重鎧矢集如蝟猶莫能傷有一胡以槍刺之手把大刀而仆終不舍卽是左營將金應

河之謂也云李長培亦自虜中還余問其戰敗曲折則曰初四日劉都督喬游擊前行我國左營次之中營又次之右營在後喬劉兩兵大敗賊兵與我軍相值將軍指揮擺列俄頃成陣告急於元帥曰以此孤軍萬無抵當之理速令右營協力迎戰元帥即令右營將李一元擡營往助纜列其軍將軍謂一元曰我兵陣於平地若不移於岸上敗軍必矣一元不從中營相去數百步從壁上觀之則忽有賊騎數千餘橫截左右兩陣之間李一元先遁一軍潰裂賊兵蹂躪斫殺大勢賊約五六萬對陣於一里之外抽送精銳

馳突直犯左營我軍一時放砲胡兵退却俄而復進多有空馬奔逸必是中丸死胡之馬也如是進退者三其時喬游擊敗還中營望見相戰之狀彈指而歎曰平地上以步軍支吾鐵騎乃如此貴國兵可謂好利兵稱不容口未幾大風忽起煙塵四塞銃藥飄散不得放丸賊兵乃敢闌入陣中將軍獨依柳樹下射必洞札賊皆應弦而倒所殪多虜將虜甚秘之矢且盡持長劍所擊殺尤多劍折不得復擊忽有一賊以槩從後刺之仆地劍柄尚在手其後胡人相言柳下一將最雄勇善射朝鮮若更有此輩數人不可敵也

忠烈錄
云蓋指將軍而言也又有一胡來言承奴酋之令收瘞 天兵及朝鮮軍死者日已久屍皆腐爛唯柳下一屍顏色如生右手握刀柄不解此乃尙將終始力戰者云先是弘立等送鄉通事河世國于虜中至是胡兵先呼通事將軍不應方其拔劍擊賊也大聲呼弘立景瑞之名曰尙輩其可負國偷生乎聞者莫不悼惋云走回人崔得宗亦言金將軍死後尙持劍柄故胡人猶恐其生不敢近前云上特命褒錄贈爵建祠立碑以慰忠義之魂余屢於朴相公第見將軍將軍身長八尺餘氣岸軒然言語寡嘿動止安閒絕無

武夫麤悍氣飲酒數斗亦不及亂一見可知其爲魁傑人也居家之行殉國之志乃其所長膂力過人射藝絕倫特餘事耳人皆慕之及至今日果符所期非烈丈夫而能然之乎 王師有征共期蕩掃天不助順人不協謀數萬生靈肝腦塗地如劉都督諸名將皆遇害喬遊擊亦自縊其勝敗不常果如是耶如弘立景瑞等褫魄戰股唯知首鼠而將軍獨奮忠效死所領不滿三千擊殺甚夥此時弘立等越視不救投降恐後通天之罪曷勝誅哉向使將軍不能蹀血以懾之虜馬乘勝已飲長江干城偉績未可以成敗論

忠烈錄
也臨陣脫走自爲偷生計有若申忠業李一元則以將軍之勇武豈難爲哉二帥不戰而降向使將軍不能明白立節而死則我國家二百年事大至誠之義其何以觀之賴將軍一死永有辭於千秋雖謂之功存社稷未爲過也大賊壓營衆寡懸絕猶且從容擺陣挺身督戰一何壯也胡兵來呼通事意在講好聞若不聞終始力戰一何義也下馬倚樹示以必死數千之衆血戰不降一何勇也手中長劍死且不釋有若夏起而殺賊者一何烈也方春暖節死肉不變怒氣勃勃其面如生一何異也自古戰死者何

代無之孰若將軍壯義勇烈如此其卓然者乎張順之屍尚持弓矢王政之死終獨不腐忠奮所激古今如一我軍能誦之天將能嘉之彼降虜兩師覩不知愧而亦能傳之至於虜中嘖嘖不已吁可尚也時之武弁趨勢圖僂發身立脚自謂得計獨將軍不肯效之及其當難笑履鋒刃視同衽席能審取舍死得其所在地爲山嶽在天爲星斗名聞華夷事光簡冊回看一時無恥之輩曾大豕之不若將軍之死死亦何恨嗚呼噫哉

題傳後

柳夢
寅撰

逸史公曰余讀金將軍傳敘事備悉足以警世獎忠可附之太史氏永貽不朽獨恨不記弘立景瑞降虜事首尾始將軍以死自矢不念暴骸之難耳寧知兩帥有異志不顧軍謨長短耶夫技有長有短以所短角所長不見蚴希矣以我之短於騎驅之於易野馳驟之地謂必勝乎將軍信善戰矣一偏裨為顏行者不過三千人洎十萬大軍俱沒於虎口將軍獨何為哉惟其義烈所激眼無白刃與劉喬兩將軍抗節俱死天下多之夫人臣不難以死報主而不有此三將軍何以戒一世懷二心者向使朝廷早知二帥陰蓄

圖生之心當漢賊交鋒勒精銳八千人就賊庭如驅羊者亦未必不以元帥屬將軍也吁人心甚危知人亦不易本柄者每得士如此國何虞焉薦將軍者亦可謂知人能得士也

傳後敘

李再榮撰

見危授命作訓往謨臨難忘身垂稱先傳故貞臣服節以成殉國之名烈士效忠用表事君之義所以崇終隱歿可徵贈諡之章紀績褒賢足尚廟祠之典纏綿悽愴人悲汧督之誅文綜核雍容世誦子山之銘讚至若棟樑宇宙並日月而揭輝扶植綱常亙古今

忠烈錄
以標榜引關張而方駕。挽顏許以聯鑣。豈非烈丈夫乎。惟我真將軍矣。粵若鐵城寶蓋。兆開龍虎之祥。金井曉星卜協。熊羆之夢。陶謙童稚志雅。好於旌旗。王濬嬉遊性惟耽於戈戟。蠶眉猿臂競推射御之藝。能燕領豹頭咸許飛騰之骨相。班護羌之慷慨常懷萬里之心。衛季路之勇剛每負三軍之氣。蘭陔柏樹。疾烏哺於孝思。棣萼荆花。感鶴原於急難。漢中韓信始逢蕭相之知。河上岳飛早荷宗公之獎。能穿七甲。精窮徐庶之九星。不識一丁目。刮呂蒙之三日。執楓宸之銀燧。見黜何傷。從蓮幕之牙璋。投歸有所。李光顏

之却妾臭味自同。桓叔道之辭婚。心期不異。再居邊鎮。克恢玉塞之韶鈴。一佐摠戎。載贊金城之鎖鑰。西山蕃種歸鄧訓之仁明。北地遐氓賴范雍之治理。志輕中貴。西京御史之風稜。跡謝貂璫。東漢尚書之氣槩。茲乃將軍之行跡也。迨夫桀胡匪茹。敢稷化於七旬。皇武維揚。乃興師於六月。宸庭降勅。有嚴後至之誅。藩服承綸。可緩前驅之舉。九重拊髀。軫宵旰於鼓鼙。兩府敷心。薦翹雄於介冑。宣城太守。遂兼轄於助防。左校甄營。仍隸符於帥閫。祭彤出戰。豈忘兄弟之情。龐德從征。已絕妻兒之戀。一封數墨。託

後事於恩爺兩綬雙銅授舊章於故吏其分決有如
此者張前軍之副隊自領麾幢秦都尉之別屯且專
金鼓殺胡林畔隨驃騎而屬韃遮虜庭邊列鸛鵝以
就陣營環獸角八門奇正之規部按魚鱗九道陰陽
之法其整暇有如此者仗皇靈而唾手擬清鞞鞞
之墟奉天討以誓心期掃鞞之穴狂風匝野吹
古月而揚沙毒稜湯空墮長虹以成暈王師輿尸
遽成狐貉之餐元帥豎幡優作犬羊之虜睢陽勢急
痛絕援之賀蘭好峙事危柰退軍之解系杜彪嬰壘
調鵲血於勁弦許虎圍垓掣龍文於寶鐔神通天地

蹴山嶽而動搖氣激風雲盪日星以回薄其膽略有
如此者滾鞍釋騎更存大樹之威風振旆揮戈益倡
中林之赴武三弓不病將制勝於殼中一鼓無前方
出奇於局內龍王廟下纔看四太子之顛馬首山前
旋報右賢王之斃裹創冒刃只餘殘甲之五千飲血
張拳獨敵兇徒之八萬其雄勇有如此者人謀不協
果致屈於壯圖天道寧論終被殲於絕塞延年戰死
李校尉之偷生司牧陣亡曹景宗之無恙淡讐未報
目猶視於中行至痛莫紓面若生於先軫齒餘七八
奚論干斗之精骨刮再三不啻盈升之鏃男兒握裏

忠烈錄
肯拋死後之龍刀。義士掌中尚把生前之虎戟。其精節有如此者。麥城赤兔寧負主人。尉子青獅竟歸何處。三靈不泯。應思厲賊之言。一氣倘存。想恥號原之鬼。層標偉節。聳萬仞而孤騫。大義精忠。卓兩儀以特立。九羗六狄。咸欽不朽之名。四海八埏。共歎無窮之聞。兵家勝敗。詎取較於英雄。叔世彝倫。庶有知於君父。金甌寶鼎。不足詫於保邦。玉檢瓊編。未容殫於紀績。何必犁庭涉漠。方畫麒麟。雖非拓障。疏關可威蠻貊。其功烈有如此者。嗚呼。贈官賻葬紆。寵眷於漢儀。褒錄恤孤。侈哀榮於周禮。致其容物。實遵大司馬。

之封。備以情文。有軼冠軍侯之詔。遼山一域。臺孰築於望鄉。隴塞千重。水自悲於去國。招魂莫返。徒勤魯矢之陳。迎櫬無憑。謾效楚芭之舞。荒原草樹。淒涼馬鬣之阡。虛窆衣冠。寂寞龍驤之塚。荆川故老。傷心陳氏之祠。淮甸遺民。揮涕南公之碣。文成三十步。誰裁撫實之篇。義見數千言。聿邁美終之敘。茲襲中丞之傳。後兼收小吏之諷。餘欲撮迹而致辭。但增嗟以累讚。筆泉墨海。竊慙幼婦之稱。月桂天葩。敢比名臣之撰。有懷而作。庶資良吏之揄揚。不昧者存。幸慰英魂之掩抑。

傳洪世泰撰

金將軍名應河字景義新羅王之後高麗時有名將曰方慶卽其遠祖也世居鷄林後徙江原道鐵原應河年十餘父母俱歿兵荒中無以營壙行號道路有異僧見而憐之爲指其葬處旣葬獨與小弱弟居力田自給旣長勇力絕人嘗手格殺猛虎由是人謂之將軍而不敢名觀察使朴承宗巡到鐵原大閱材勇應河騎射冠軍承宗大奇之未幾中武舉戍北邊還無所知名承宗判本兵始除宣傳官有不悅者汰之應河卽日歸鄉里杜門無事時與邑中子擊雉兔山

谷間以自樂及承宗出按湖南辟應河軍官時宣廟新棄位光海諒陰承宗戒麾下酒色莫有從者而獨應河律已謹嚴晝習射夜讀孫吳承宗益重之都體察使李恆福聞應河將帥才奏薦爲慶源府判官已而爲三水郡守北虞侯在北邊者數歲當是時建虜張甚侵犯上國天子憂之命楊鎬經略遼廣戊午秋大舉討虜徵我兵我以姜弘立爲都元帥金景瑞副之應河以宣川郡守充助防將領左營兵屬景瑞應河度見制不克展其志請獨當一面奇兵出咸吉道直搗賊窟以分其勢不許臨發與家人訣處置

忠烈錄
後事弟應海欲隨往應河謂兄弟俱死無益也止之
解印授郡吏曰我往必死敵又以書托朴承宗男女
婚嫁己未春二月率兵渡江而西與天朝都督劉
綖遊擊喬一琦會入虜地三百餘里轉戰破十餘堡
抵富車嶺下天兵前我左營次之中營又次之右
營殿而進會綖餉援絕虜詭漢卒裝誘墮重圍夾攻
綖力戰死一琦敗奔我中營天兵既敗虜去左營
一里薄我衆可五六萬騎而應河所領兵不滿三千
應河令砲卒悉前行使人告弘立曰敵衆多孤軍恐
不可當弘立令右營將李一元助之應河謂一元曰

我步彼騎陣易地不便急移兵據岸不者敗矣一元
不從俄而虜騎數千突兩陣間陣截爲二一元懼先
遁右軍遂潰敵盡蹂殺己縱銳騎直犯左營我軍砲
火齊發敵却復進者三時喬一琦在中營從壁上觀
歎曰平地上步戰鐵騎如此天下勁兵也勸弘立救
之擁兵不動一琦見弘立有反意叱曰反豎吾不爲
汝縛與賊大呼一躍投絕崖而死戰旣久大風忽起
塵沙四塞砲火不得發賊乃衝突橫擊一軍皆沒獨
應河下馬倚大樹立彎弓射賊應弧而倒死者不可
勝計矢盡卽拔所佩劍又擊殺虜甚多劍折不復擊

應河身被重甲矢集遍體簇簇然蝟毛然莫敢近有一賊背槩之仆地劔尚在手賊恐其生又莫敢前時有卒史一人奉矢服在側又一人執幟前立應河死二人亦同死弘立等不戰而舉軍降先是弘立出師光海授密旨及入虜中弘立潛遣通事河世國先之至是虜來呼通事急應河佯不聞戰益力方其拔劔擊賊也大呼弘立景瑞曰犬彘輩反投賊乎應河既死虜衆相賀且相謂曰柳下將最雄勇朝鮮更有此數人不可敵遂謂之柳下將軍後虜酋使人斬諸屍日久尸皆敗獨應河面如生勃勃有怒氣右手握劔

不釋云事聞贈領議政建廟碑龍灣 神宗皇帝下詔褒贈遼東伯賜妻子白金 仁祖五年議者以灣上廟碑有不便去之應河爲人身長八尺餘氣岸軒然言語寡嘿動止安閒飲酒至數斗不亂初應河赴慶源人有言貴家女美可挈往將軍豈有意乎應河謝曰吾家貧彼貴家女今畜之耦室則不可賤則憾矣且大丈夫生世豈可緣妾以徼利哉嘗會葬凝原君高陽上遣中貴人視喪或勸應河見中貴人曰將軍好身手中貴人見之必聞於上應河不肯識者多之平居奮勵以古名將自期每有殉國之志及其死

忠烈金
也忠義壯烈風動天下至今聞潞河之戰者莫不瞑目髮衝冠西向涕下也將軍弟應海嘗辭連逆獄孝廟曰豈有應河弟而反者立釋之拜為北兵使後孫多以武顯遇之塗者輒指之曰此金將軍孫也弘立既降為賊用後歸人有畫將軍倚柳射賊弘立等面縛降虜狀以示弘立弘立見之恚愧而死外史氏曰應河忠義烈丈夫哉惜乎用之不早而用又屈人下向使二萬精銳屬應河以討賊者虜可破也然應河一死使天下知我東有忠義死節之臣猛氣餘烈足以折虜心而奉矢執幟者亦烈士士也應

河死後二十七年 大明遂亡於是人益思而悲之

傳李泰壽撰

公字景義安東人身長八尺餘膂力過人射藝絕倫

氣岸軒然安暇無武弁麤悍氣年十八格虎殺萬曆

戊午 帝以建奴匪茹遣都督劉綎游擊喬一琦以

征大發川蜀遼兵本朝本朝發二萬兵以姜弘立為

元帥金景瑞副之將軍以宣川郡守領左營兵隸景

瑞標下與家人訣別封印授郡吏弟應海欲往相救以俱死無益止之渡遼至富車

嶺記未二月時帝已倦勤闔賢用事軍興不繼諸

軍亦輕進失利都督自經死將軍以兵三千直前擺

忠死錄

陣弘立使右營李一元擡營相救胡騎萬對營直犯

將軍以砲手為前列一時放丸聲震天地賊兵退如

是者三喬游擊敗還弘立軍中望見歎曰俄而大風

忽起煙塵四塞炮矢不得發賊乃并力衝突我軍立

盡將軍手弓腰劍獨倚柳樹下二卒不去一奉執旗將

軍矢不虛發賊屍成堆虜貴將將軍身被重創矢集

如蝟猶莫能傷矢盡遂手劍擊賊兜頭札腰剗然并

落聲若劈山每得十蕩而十空先是弘立送舌人河

世國于胡陣以乞降至是虜呼我人蓋欲招誘也將

軍不應大罵弘立曰爾偷生負國不相救也劍亦折

張空拳益自奮胡人相謂曰柳下一將最雄勇善射

朝鮮若更有此輩數人不可敵也一賊從後投槊遂

仆地而絕四三月猶握劍柄不捨怒氣勃勃賊相顧愕

貽不敢遽前喬游擊遂自殺虜瘞兩陣死屍而將軍

獨不腐劍柄猶在握矣本朝贈領議政建廟于龍灣

江上豎碑記蹟 帝詔贈遼東伯差官致祭于廟其

誥命引重甚盛又賜妻子金賂 顯廟丙午建祠鐵

原府而妥侑焉

進忠烈錄箋天啓元年辛酉十一月朴承宗等

竊以死重泰山既扶綱常於一代忠貫白日宜樹風

忠烈錄

卷五

十五

忠死金
聲於萬年肆竭編摩冀裨勸竊觀殉國之道必以
伏節爲先殺身成仁可表貞臣之操臨危授命方稱
烈士之名顧惟宣川守應河本來行伍間一介呼鷹
逐鹿以射獵而爲生收弟奉親全孝友於所性人言
方慶之後裔傳世餘風身出崔瑩之故鄉見金如石
恂恂初似醇儒凜凜用若快鶻渡江擊楫自知必死
而無還倚柳射胡何幸舍生之有所不但中夏之咸
服抑亦諸夷之共驚雖稟松柏之勁姿諒由君上之
善迪曾聞建祠於鴨綠行路咨嗟又見字孤於羽林
介胄感激第恐歲月之易逝而致事迹之不傳紀寫

生平實倣中丞傳之遺法兼採歌詠略効精忠錄之
舊規恭惟體天興運俊德弘功隆奉顯保懋定重熙
神聖英肅欽文仁武敘倫立紀明誠光烈睿哲莊毅
章憲順靖建義守正彰道崇業主上殿下功光祖宗
德配天地招攜以禮守在四鄰事大必誠義形萬國
故令死綏之忠魄得霑隱卒之殊恩降旨賜銀 天
子猶且寵矣出題試士臺臣乃獨非之初無一毫私
情顧此心之自慊當待百世公議被多口而何慚不
憚攻己之嫌願遂顯忠之志茲揚虎烈用進燕閒伏
念臣等宦海孤蹤焦原側足綺麗鳴世敢効庾信之

忠烈錄
江南慷慨捐軀庶獎杲卿之河北所撰忠烈錄一卷
謹隨箋以聞無任激切屏營之至臣承宗等誠惶誠
恐誓首誓首謹言

科箋

科題擬本朝訓鍊都監進忠烈錄天
啓元年辛酉九月庭試朴安悌壯元

若有斷斷兮效死既著殉國之誠恐其泯泯而無傳
敢進褒忠之錄臣無他技王請念茲恭惟我后君止
於仁人善不蔽一善率以用恆切顯遂之心三綱刊
而行克盡褒勸之道願惟應河之素節早抱許國之
丹忠分虎西關人稱長城之萬里仗鉞北塞自許醜
虜之一殲夫何天意之難諶而致我師之不利陰山

援絕忍效李校尉之投降睢陽矢窮益切雷萬春之
抗義其所擊殺奚止數十百人不渝夷險獨有一介
義士男兒死耳杲卿之舌尚存日月照心甚弘之血
忽碧臨大節以不奪質諸神而無羞拱北一乃心竟
遂死生之以環東數千里賴有節義之稱寵錫千金
霈 皇恩而褒節榮頌三字侈聖渥於立祠無愧龐
德之效忠猶欠巡遠之立傳顯其為善者實是礪世
之規褒之乃勸焉可闕成人之美茲述平生之事業
目以忠烈而進投若已有之歎斯人之難作匪躬故
也嘉乃節而不忘精忠凜雪霜難盡一篇之內誠節

忠烈錄卷之六
冠今古可永千載之譽筆之于書非但記一人之行
用傳乙覽庶幾垂九重之恩斯切愛而之心敢云阿
其所好伏念臣徒知戀主未免具臣頗似尋常恨當
年之不識有所矜式冀後日之流芳

忠烈錄卷之六

悼詩

沈喜壽

休道東川滅貊卑山西勁氣盛於斯胚胎始挺惟馨
質長養終歸最健兒力挽千牛無敵勇肯藏萬甲有
餘奇孫吳秘訣何常透廉藺雄機庶或窺混迹韜鈴
淹白屋發身科第近丹墀宣城符印邊虞棘遼塞干
戈殺運滋奴賊橫行凡幾歲王師薄伐此其時朝
廷震疊戎衣怒經略兢嚴戰角吹兩帥皆憂傳檄急
三軍還恐執酋遲助防忠憤嗟誰奪主閫奸謀誓莫

忠烈金
知寶劍穿腸膏錯落強弧射面血淋漓扶傷救死那
能辦開目噓聲未暇為遂使兇鋒俄尔挫從教虜勢
少焉衰雲沈颺起天難恃矢盡弦銷鬼亦欺深恨中
營排鬪志偏憎老譯舞權辭彼哉陵律偷生可今也
顏袁抗節空只學見危能致命底心臨亂惜殘肌成
仁任暴沙場骨取義遑收馬革屍念絕妻孥唯徇
國誠懸 君父便忘私周哥慷慨輝青史南八貞剛
建赤旗一箇好男箕壤裏四圍虛塚鐵江湄重泉尚
切殲讐願異域寧追復魄悲辮髮更堪驚吐舌降腮
猶覺痛顰眉劉喬鸞鳳均哀惻立瑞鴟鴞競唾涕聖

辟施恩培世教元臣作傳樹民彝羽林錄子申前典
猿臂圖形協舊儀贈爵初非慳議政恤家奚止飭該
司愍勞播詠仍崇誄表績畱祠又豎碑壯烈堂堂撐
宇宙英名凜凜動華夷行聞 皇上頒優詔以永褒
揚億代垂

柳根

季子嘗有言魂氣無不之斯理非杳冥昔賢豈余欺
况此真丈夫雖死猶不死魂兮應歸來如水必在地
原隰嗟何求兄喪弟所盡先隴營孤冢復衣替旅櫬
猶勝兗州人刻木葬鮑信不埋猶有存鬱鬱山河氣

征西荷戈徒夫孰非男子想當大呼時長虹忽焉起
撼山誠未易匪石不可轉被搶劔在手經日色不變
降虜能不媿醜類尚知勇中丞厲鬼願洛陽思鄉夢
羽林字孤兒尚書紆寵錫成敗未暇論功烈等平賊
一死輕鴻毛有時重泰山取舍倘先定殺身諒非難
海東忠義節實賴將軍立英靈為列星夜夜照碧落
金將軍之弟曰應海聞將軍戰死富車招魂于
昌洲江上將葬于先壠求挽詩甚懇書以歸之

李好閔

吾宗孫子同征死痛哭雲天不輟哀此老常懷馬革
志為君重酌彘肩杯李陵文字河梁泣周處麤豪大

漠雷厲鬼沙場猶殺賊招魂江上倘歸來

閔馨男

平生何幸識公顏耿耿長留夢寐間一戰雄名垂宇
宙三韓義氣動天山素心不負君親重壯節猶驚
賊虜頑泉下孤魂應感泣恩章褒贈竟崇班

李慶全

慘澹淡河事已非沙場何處返王師不緣一節終
無媿那使千秋永有辭汴水廟前雲漠漠西湖原上
草離離昌江日夜波濤急倘為英魂駐少時

李廷龜

堂堂八尺好風儀獨把前軍破賊旗難不偷生猶職
分勇能摧敵是男兒精忠已徹 天皇鑒名姓何曾
聖主知養將百年終底事只爲成就一偏裨
矢盡重圍接短兵抉腸猶戰死如生長畱千載英雄
淚不墜三韓禮義聲氣作雷霆殲醜虜魂歸祠廟荷
恩榮胡兒亦表將軍樹何用燕然謾勒名
匹夫能爲天下重忠臣元自孝中移一時勝敗尋常
事千古彝倫造次持必滅賀蘭應有志並圖龐德彼
爲誰至今遺憤淡河水嗚咽寒波日夜悲

申欽

金將軍生不識君面官不登節樞賊至爲萬人敵兵
敗爲烈士夫虜酋死咋氣畜縮漢騎抵掌增壯圖骨
爲沙場血漬草魂遊無極鎮禹強金將軍真將軍千
古姓名香噫彼姜元帥尚書之子相國之孫少年決
科食太倉青紫金緋蒙渥恩噫彼金元帥生自岷隸
擁旄上壇九重非常賜顏色鎖鑰年年西北關兵不
交膝先屈甘爲厮役羶裘下金將軍是何人兩元帥
彼何者一死一降一臭一芳芳臭誰能混天高地亦
長我歌金將軍金將軍歌已哀歌已哀魂兮歸來

柳公亮

忠烈錄
王師直過鴨江濤擬擣千重虎穴深元帥本無交刃
志將軍獨奮死綏心義聲遂使華人歎壯節還教醜
虜欽骨委沙場魂返國可憐虛墓故山岑

尹昉

漢家三十六將軍獨有宣城九尺身未識真卿作何
狀極知南八不逡巡風雷憤已當時結封贈榮猶此
日新欲殉尚方曾賜劍重泉一斬負恩人
壯士捐軀大漠春居然山下尚風塵天教北虜遺餘
孽世識東韓有一人毅魄未歸榆塞上褒祠新煥鴨
江濱君王恨不知公早拊髀中宵感歎頻

執戟何曾荷主知分符纔得作偏裨時平闔鉞推培
克世亂精忠出等夷撲賊定應爲厲鬼返屍那復夢
孤兒龐圖鮑刻哀榮備沙塞英魂泣鴻私
行間拔出好男兒實被今時上相知撫劍幾多思報
效忘身非獨爲恩私人才難得真堪惜一死猶榮未
足悲二十年前相見早老夫曾亦識奇姿

金蓋國

痛飲黃龍計已空淡河援斷鼓聲終生全毳幕人無
恥戰沒沙場鬼亦雄行見羣胡來面縛誰知一死卽
頭功威風凜凜今猶在虜騎彷徨不敢東

申湜

金甲渠魁一箭殲華夷嘖嘖歎奇男那知督府當前
蹶夏見中師在後燿子子隻身捐塞北堂堂大義動
江南旌忠新廟西關路長使行人聳視瞻

數萬王師一抹煙孤軍何處可圖金沙場飲血風雷
吼霄漢揚名日月懸故國方成新廟宇歸魂倘記舊
山川昌洲江上波濤怒忠憤千秋鬱未宣

李必榮

憶昨王師出塞忙塵昏窮磧日無光三軍塗地虫沙
伏一柱擎天義烈彰羣幕幾人爭拜跪忠魂何處獨

彷徨名傳夷夏三綱立氣作虹蜺萬丈長東郡墓前
雲慘慘睢陽祠下水洋洋可憐魏壁新圖畫畱與千
秋起感傷

崔瓘

曾於北路見儀容瑰偉堪爲一世雄手把長刀當萬
賊身依大樹奮孤忠天陰雨濕胡山暗血碧憐紅漢
塞空朝夕備邊論將地干城那復有如公

洪命元

淡河事去奈天平墮地綱常手獨扶節義向來元自
許君親此日果誰無忠魂不死應歸國怒面如生欲

搏胡回首磧西千萬里碧空唯有月輪孤
寶蓋之山雄且奇環擁鐵州勢盤礴淑氣往往鍾人
豪崔萬戶來一寂寂將軍繼出風骨仍身長八尺射
洞鐵密昌相公按關東偶然識拔稠廣中歷試內外
無不辨利器盤根會當遇黃馬之年月建已建酋岨
強窺中土我國隔一衣帶水西門旁近須用武宣城
地大人且繁故遣將軍兼理劇是時 天子大徵兵
我軍一萬期協力問誰為元帥晉山姜大夫上台之
孫尚書子黑頭二品榮寵殊問誰為其副關西節度
龍岡種拔擢偏紆兩 朝恩官躋輔國威名重幕下

從事盛文武中軍偏裨俱才勇中營定州牧慣誦黃
石方右營順川守妙技能穿楊將軍領左營隱然強
寇敵外貌談論人所同誰識將軍腸鐵石 天朝名
將劉與喬經略命摠東路師二月飛書催渡江要與
大軍犄角之牛毛嶺淡河寨胡地山川險易誰得知
天兵見可不可停疾走正中狡虜計倏忽平原風
雨集飛蛾烈焰肉餒虎大都督遊擊府遼陽突騎西
蜀步煙消電滅歸何處將軍麾下只三千屹立不動
如山嶽四圍列戰格砲火飛霹靂回頭不見中營兵
但見胡馬簇簇如雲屯不見右營來助戰但見土崩

忠烈錄
波圻頃刻無餘存遙望元帥旗飄搖山上顛將軍大呼何曾聞將軍到此無奈何瞋目膽欲裂平生石八弓利鏃攢霜雪一發再發至十數旁疊四五無虛控矢盡弦絕氣益奮腰間躍出青蛇動隻手橫流詎可障松摧竹折天無語向來頭角競矜誇今日低回作何舉投鎗釋甲猶恐後金貂牙纛誰家物世臣不足恃名聲盡虛耳健兒好身手被驅如牛羊羣胡血洗箭躡躍過所望不有將軍死舉國無男子不有將軍死綱常竟墮地不有將軍死虜氣不少挫不有將軍死羣疑釋不得吾邦事可白後世辱可雪烈士憤可

攄三軍義可鼓將軍一死重泰山上不負所知下不負所賦先軫面如生矮張槊猶握是知鬱結氣萬古同一轍胡中亦相謂如此將軍復有幾將軍妻子在宣城玉札丁寧護行李立祠西州臨大道剛使華人聳聽視褒贈大司馬記實太史氏流芳不待附青雲相公始終良獨勤作傳託李翰求詩遍朝紳非關事張大聊以慰忠魂百代聞聲尚感歎况我過逢僅閱月爲君慷慨歌一曲悲風北來吹毛髮

李睟光

第一奇男子金天夙降精將壇推譽望邊徼伏威名

矯矯兼人勇桓桓蓋世英豹韜空有略猿臂久無成
醜虜滋南寇王師戒北征藩邦誰後至尺劍願先
鳴手下三千士胸中十萬兵戎麾隨督府鼓角振天
聲得虎須揆穴誅鯢擬築京皇恩期報効異域可
橫行不謂重關阻長驅百里程妖氛迷大漠殺氣繞
前旌馬蹀陰山動戈揮漢日明殲兇百矢盡許國一
身輕白刃拳猶壯黃沙骨已橫勢孤功莫遂胡畏膽
皆驚血入平蕪赤風吹大樹傾冰霜明素節天地鑑
丹誠月暗長榆塞雲愁細柳營千秋名不死七日面
如生復矢龍荒遠歸旌鴨綠清哀音憑羽報感動軫

宸情享祀仍遺朝衣冠獨返瑩天書新雨露泉路
盛恩榮賊氣知先奪戎心夏不萌懦夫思敢決降將
愧忠貞啜血同和尚刳腸比杲卿褒嘉歸史筆惠愛
泣州氓怒目曾無虜英魂尚不平山河餘壯氣應復
作長城

南瑾

解甲偷生兩帥同胡為血戰死胡中氊裘盡懼兼人
勇華夏心嘉貫日忠魄降虛瑩松柏護光垂青史姓
名雄非君孰為東藩訟薦擢或稱首相公

尹壽民

忠烈錄
狼山殺氣漲猪江西北衝颶卷旆幢八石弦開天爲
怒雙龍劔折虜猶懣摠營將校皆投死元帥詩書早
納降一箇摧鋒全節士漢藩功烈定誰雙

宋駟

白草黃沙大漠寒將軍一死重三韓當年若使爲元
帥直向穹廬斬可汗

權盼

東師西入協天誅塘臂求伸却不圖一將先鳴都是
膽三軍可奪卽非夫身當白刃歸心斷胄落黃沙戰
骨枯應有英魂隨太白快宣嚴殺盡匈奴

誰似宣城太守雄獨驅戎虜犯通中魂飛塞磧無歸
路恨入胡山未掛弓須識盛名要著節不緣天意勒
成功傷心復矢昌洲上蕭瑟平生大樹風

柳希亮

塞草淡淡塞日昏亂山何處喚忠魂冥茫河路蛇蟄
援零落沙場虎豹韃隻手獨遮天下勢重名那止域
中尊恩開大額丹青廟汗愧羶庭未死髡

趙挺

赳赳將軍蓋世雄恭承王命擬平戎威加青海常輕
敵力盡天山未掛弓壯氣輪困橫塞北孤魂飄泊向

忠烈金
江東人生自古誰無死千載惟稱烈士風

柳夢寅

皇帝四十七年春 帝命徂征于女真東兵一萬數
千人同時西渡鴨江津元戎小豎濫儒巾副帥賤者
曾負薪一朝橫金丹其輪虎豹皮蒙狐鼠身人言弘
立其愚鈍輦糞不足充胡民又言景瑞跋扈臣禍心
藏中如賊筠朝廷揀材舍括枕熊虎將軍屈不伸反
令雞狗領鳳麟駮駟俯聽廝養馴桓桓八尺來服袴
晉敢吳鈞弓六鈞宣城精銳競駢駢助防風稜霜雪
新劉喬天將號令申火車千乘何麟麟牛毛嶺峻星

漢隣巨木簇立冰霰堙巡邊諸官酒食陳 王師餉
絕動經旬叱喝飢兵歷嶙峋胡地春深猶凍皴黑颯
猝起驅羶塵塞廬難追東郭魏甲騎馮陵超荆榛辯
髮奮戰爭涕唇三軍駭擾同驚磨積屍山峙淡河濱
逆臣丐生知幾巡虜中飛旆潛來詢中營八千忽遭
逆驅羊北首馳浚浚男兒死國正此辰唾手張髯誓
蒼旻舌人呼徠目轉矚忠膽見敵尤墮溘強弧命中
捷若神飲羽伏弋魚襲鱗死者失綏倒紛續傷者浴
血聲悲呻雲披湖退却前頻利鏃雨灑開蜂屯身依
大樹替楊楮百矢已盡猶怒噴腰間復抽刃如銀人

忠烈金
馬辟易啼酸辛亂領蔓青蒼山垠賊將剗腹腸輪困
月暈漸窄魚嬰緡忍看毒手鎚珪珉甘心殺身以成
仁血化碧土光磷磷身離草野戀楓宸陽陽面色猶
含頻兩帥生平耀簪紳豈不知有君與親銜恩茹澤
自胎娠禮讓世世箕疇導一聞鳴鏑背彝倫磬折犬
羊同裸裎胡人夷唾甜八珍肉酪血漿看濃醇丘墳
暴骸越視秦母子鯨鯢眉不顰忘讐射天死亾臻那
免膏流青海濟公之勁節孰磨磷氣橫天地充氤氳
江河洗憤應不湮震霆世寃知無因握劔不釋生死
均魂斫醜虜殲兇囂門關印組周漢循追封判書恩

如綸矢復刻藏先人窀通韻雨泣佯親賓靈旃東返
虛櫬輜列邑咸賑妻孥貧相國知己非媼姻立傳獎
忠何諄諄太史特書名不淪汗清流芳長彬彬仰止
千載齊岷岷

李善復

古來何代之英雄誰似堂堂貫日忠戰血尚斑沙磧
裏壯魂猶厲塞雲中忍看兩帥爭投賊剛道千秋獨
有公江樹渺冥關路黑滿襟清淚洒悲風

李成吉

星朕雞林野雲仍亦世雄橫天凌鸞鸞落地解桑蓬

忠烈金
克稟奇男格多存乃祖風餘人觀不識賢相揀惟公
部曲壇將築班行路大通徵兵自 北極問罪及西
戎鴨水三軍渡宣川五馬忽要看塞草綠誓掃狼煙
紅入穴方麀賊臨危敢愛躬目前無白刃心上有丹
衷猿臂揮星劍長腰佩月弓孤軍心不動特立勢將
窮射羯期無類爲臣可盡忠鏑飛人輒斃胡走壘幾
空求救呼元帥槌肖證上穹將降嗟孰共軍去與誰
同虜掣英魂散龍沙碧血籠將軍思職分聖主錄勳
功榮贈六卿峻神碑十丈豐遙知墓前樹枝葉向於
東

宋英耆

皇帝四十七年春薄伐奴酋命將帥我國曾荷再
造恩二萬兵因檄徵起將軍脫穎爲營將人不知其
死所矣披甲上馬渡江去戰陣無勇其心愧 天兵
謂虜在目中要入虎穴得虎子期會未成綿竹計進
退先誤兵家事或喜首功而輕進或欲投降無鬪志
前鋒陷沒後軍潰萬壘山中夏何恃將軍雖奮十倍
勇已無英雄用武地勝與不勝能無懼怒髮衝冠裂
目眦大柳之下如負隅手持強弓腰佩矢身當萬刃
雙伐中屹若長松風雪裏射則貫兮貫必雙賊將死

忠烈金
者非一二胡奴不敢直前來聞喝驚憚皆走避且戰
不至我獨死且退亦足成壁壘然無蚍蜉蟻子援彼
蒼天兮奈於此弓摧矢盡力又竭一掬餘存唯義氣
天日慘慘忽黃昏悲風蕭蕭血壯士身雖寸斷寸寸
斷履胡一心猶未已兵不用命罪孥戮百夫千夫何
乃尔提督自焚遊擊縊元帥兩將坐而視苟無將軍
此一死孰謂吾邦知禮義生不長生必有死死如此
死死不死非徒天下盡知名凡有血氣皆稱美啓行
褒錄乃舊典判書追榮特降旨妻封弟郡皆異數墓
軍資糧亦恩賜魂兮歸來莫遠遊古月狂風無處寄

魂兮歸來不如家谷有幽蘭洲有芷應還故國効結
草豈向沙場爲厲鬼新祠香火不盡哀舊隴松楸無
限淚楓林青黑去來時聖主恩深知也未

李安訥

虜騎憑陵漢兵沒煙塵咫尺暗麾幢將軍獨射賊數
百壯節古來誰等雙輕敵曾聞項梁敗辜恩卽見李
陵降褒忠不用新祠宇千載威名在萬邦
挾槩彎弓立虜中力窮身死是英雄黃沙血濺魂何
托白日名懸迹未空漢將獨推關羽勇宋朝爭說岳
飛忠分明一柳陰山路萬國回頭揖下風

尹暄

接戰春來未解圍
 淡河日落漢兵稀
 將危夏鼓軍中氣
 縱敗猶加海內威
 自是死高蘇武節
 豈宐生泣李陵衣
 英魂烈烈招何處
 不斬名王不肯歸
 尺劍提來擊大荒
 英雄事去奈天亾
 一身勇力當千尺
 百萬古綱常作棟
 樑戰罷悲風吹朔
 漠魂招塞月照沙
 場胡雛亦誦將軍
 義大樹飄零紫塞
 傍初聞塞上失長
 城歎息英雄草昧
 生張悌久蒙丞相
 識霽雲無賴賀蘭
 兵名傳夷夏忠難
 敵氣作風雷賊可
 平千載海東新廟
 額聖恩隨處鵝冠
 榮

金塗

獨戰沙場虜勢摧
 元戎旗鼓却徘徊
 黃間力盡忠臣死
 紫誥恩深聖主哀
 楚澤遺祠空瑣甲
 祁山新塚已蒼苔
 當時怒氣今應在
 大漠風雲鬱不開
 說到淡河涕自橫
 匈奴未滅失長城
 百年禮義三韓土
 一箇男兒四海聲
 隴樹冥冥魂欲返
 江流哀哀恨難平
 延年戰死師全沒
 亦獨何心李少卿

慶暹

漠漠淡河何處尋
 招魂江上倘來臨
 元戎拜虜爭投甲
 壯士捐軀獨誓心
 樹下英風夷亦歎
 海東孤節

帝猶欽應知未死精忠氣砥柱三韓鎮古今

李尚毅

天教國士生東海要把彝倫揭萬邦廿四郡中還有一二千年後夏無雙孤威壓塞旄頭蝕劍氣衝霄虜
膽懍若使賀蘭能助勢應知曳落自來降楊興力盡
身盈鏃雷萬圖窮血滿腔欲作將軍傳後敘誰家老
筆大如杠

吳百齡

漢旌顛倒日無晶聽說將軍柳下聲白羽腰間抽已
盡青萍手裏沒猶鳴非緣一箇奇男在誰信三韓大

義明借問英魂倘來否片雲踈雨過孤城

權愷

黃金橫帶彼降俘白刃忘身是丈夫均均荷恩先附
賊顏張未達竟捐軀從知匹士能光國倘有英靈定
殺胡聞道家貧方乞糶朝廷須念賑妻孥

李春元

二帥投降日孤臣戰死時使微公奮敵能免我為夷
勇略還餘事綱常是素持乾坤有正氣萬古幾男兒

洪瑞鳳

東韓大男子華夏豹雷皮一死還餘事平生只秉彝

忠烈金
能全張悌節不負武侯知作厲天應許神兵掃醜夷

鄭廣成

千里行師一夕非將軍英勇顯臨危沙場鼓絕天
閣遠寶劍鋒摧白日知新息本甘屍裹革彥章方遂
豹留皮忠魂毅魄終難泯應化風雷殄醜夷

金大德

征西諸將孰英豪臨陣唯公戰最鏖猿臂獨當驕虜
懼鴻毛一擲泰山高沙場骨暴悲寒月江塞魂招起
怒濤遺像凜然祠宇煥詩人爭詠聖君褒

洪慶臣

自許東藩敵愾才先鋒北首迅如雷風生猿臂陰山
震力盡龍沙大樹摧勇烈爭傳喧毳幕恩榮追及煥
泉臺偷生二帥應羞死令譽千秋定不灰

天兵當日出凶門八尺身隨萬馬奔許國一心知
有死懸軍千里奈無援胡中共服呼猿技江上空歸
復矢魂伏節豈徒彰大義為君端欲報皇恩

李棧

將軍威令迅風雷直擣淡河敵可摧唾手不忘裹革
志喪元終失濟時才精忠凜凜華夷見大節堂堂天
地回江上招魂封葬處思鄉孤夢倘歸來

忠烈錄
長驅鐵騎向邊城誓掃妖氛洗甲兵投袂豈曾留白
羽斫顏終不捨青萍忠肝塗地天應泣壯氣成虹虜
亦驚怛悵英靈何處托昌河嗚咽怨難平

金縷

陰山戰敗鼓音衰漢將輿尸忽什旗元帥惟思降賊
虜左營誰識有男兒身當虎口寧辭死陣效魚麗却
出奇壯氣吐虹心憤惋長戈揮日血淋漓彎弓獨立
誰相救縮手傍觀豈忍爲 主辱未湔生亦愧公頭
可斷節難移堂堂大義華夷見凜凜孤忠天地知此
日衣冠危左衽向來兵甲滿西陲招魂莫道鄉關遠

憂世還增志士悲欲向沙場酌杯酒不堪羌遂月中
吹

趙纘韓

漢軍遙懸絲貫魚涉險仰堅如擣虛東韓健兒十千
餘一聽督府爲疾徐甌脫驚呼報戎王戎王吃哮恣
兇恠鐵馬騰霄吼飛虎甲光射日凝煌亾劉燒喬縊
勢窮感漢血波道懷沙場公時頤指左營來怒髮直
豎如長槍飛身捨馬挺若峯猿臂引月流星忙洞肖
達腋一穿十羌屍斯須堆阜岡大旗前頭落金甲足
履知是名王腸此時那無蟻子援覆奴巢猶一毛熱

忠烈金
誰家母產兩帥出膝胡之庭鼠拱穴勒精八千就束
縛疾視將軍似秦瘠嗚呼矢窮無奈何大樹猶衛將
軍魄男兒節義有如此天地低昂鬼瑟縮不啻奴人
競嗟歎 天將驚傳淚橫臆將軍之精胡可泯上爭
日月星辰白將軍之氣胡可滅或為風雲與霹靂千
載之光千載聲知有將軍精氣激九重褒贈可掩幽
江上有祠華夷伏魂為鬼雄鎮西土矢復只為寧先
墓噫吁嘻安得斫斷奴酋髑髏來哭掛將軍墳上樹

睦長欽

八尺身亾日三韓國活時 天皇惻然感聖主為之

悲月照龍沙骨雲寒鴨水祠傷心大元帥北面事奴
夷

成晉善

轉戰沙場碎鐵衣將軍躍馬死重圍一生報國心常
狂壯節如君古所稀百歲芳名光竹帛千年偉績寫
龍旂胡山迢遞胡天濶欲吊英魂何處歸

李命男

未應風沙品位卑胡令天下慟如斯黑金舊國餘雄
氣更信生年化健兒烈烈心肝弼義勇能熊骨相挺
壞奇高墉遇隼材堪射虎逢牛志早窺行叶棣詩

忠烈錄
稱素里名參桂籍唱彤墀再登蘭綺英聲播一赴楸
城惠澤滋聖簡始膺西塞日 皇靈大振北庭時威
騰紫氣前茅進令肅嚴霜盡角吹 天將已先揆虎
銳中營敢後斫蛟遲臨危此日孤身在報 國初心
一劔知如雨僕姑犀洞貫哀原長狄血滲瀉賊皆遁
縮初無敵人若鋪敦事可爲魚腹雖空心益壯龍泉
夏折鼓還衰提兵救死方呼急解甲偷生反見欺獨
向日星昭大義肯思猿鶴愛殘肌身離草野曾攸願
死答虞歌分所宜渙及重泉增寵秩榮隆華袞降褒
辭圖楊可敬騰綃像葬鮑何憑刻木屍愚智同哀由

歎節華夷共惜詎因私幸看朝著彰賢弟繼典關防
建舊旗義骨縱難收柳下忠魂特賜祭江湄鐔猶在
手知懷憤面尚如生爲益悲往事欲言彌切齒來虞
亦棘合攢眉殊途趣異乖蹤跡同榜情淡倍涕洟一
介倘微爲國士三韓那免熄民彝孤孩惠恤添新渥
祠宇尊崇邁古儀百特有才官不滿三軍制敵命誰
司旣揮左史如椽筆復豎襄陽墮淚碑氣作山河應
捍圉神爲厲鬼必殲夷從今一部將軍傳能做人臣
任朔垂

沈誦

忠烈金
不識將軍何狀人爲歌哀挽向蒼旻通身是膽驚胡
虜滿腹皆忠動鬼神使我東方鍾鼎重傳諸 上國
史書新莫言魂氣成猿鶴應作山河鎮八垠

車雲輅

毅魂招得鴨江邊片雨孤雲落几筵戰死將軍忠貫
日投降元帥罪通天綱常大節東懸國義烈英聲北
照 燕悵悵陵圖與葬刻千秋奇跡在宣川

遼北古建州藏蹲築株糜窺覷中國界衝揆恣慧孛
竊號稱可汗生憎兩阿骨 天王赫斯怒摠戎申薄
伐藩國亦受命萬甲伺俱發淡河纔入境未及豺虎

窟大將爭小功半道交相猝誤墮敵筭中全軍甘覆
歿吾邦二帥臣膽怯心隕越望風齊解甲穹廬投拜
謁英烈金將軍精忠貫日月臨危氣益壯據險植盾
馘平生見敵勇奮擢如快鶻彎弓插白羽隻手當萬
卒百發洞宵腋前驅總顛蹶矢盡却揮劔亂斫擲頭
顛靶決劔又折岳立自揭揭兇鋒感如蝟雷吼猶包
勃痛殺八尺軀摧殘見騎斲英聲振域中轉目豎毛
髮當初錯料事不以公授鉞豈知陵與律投降有倉
猝戰蹟遂上聞褒旋下九闕奕刻旣悲涼陵圖亦超
忽蒼茫鴨水邊廟貌高突兀我亦獨流涕篇章替碑

碣江山及壯節萬古俱不竭旌忠祠古詩○旌忠祠在龍灣鴨綠江上後因虜使之往來拘於耳目祠毀碑埋遂不知祠名之爲何今因車滄洲詩始知之故書錄于詩末以備後之信

黃益中

大丈夫身光嶽精淡河千里遠從征沙場已決將軍死竹帛應垂烈士名毅魄英魂何所托高標壯節莫能爭東原舊土孤山畔多少行人涕淚盈

金著國

陰風慘慘陣雲平一日淡河殺氣橫大義所存皆可死將軍於此獨捐生昌江豈洩無窮恨塞草猶知不

朽名遺像凜然餘怒在胡兒安得近邊城

奇允獻

鐵騎乘風殺漢兵五千精甲摠偷生淡河不有將軍死薄海誰知義士名大漠遙分玄菟塞暮雲愁壓黑山營天涯厲鬼招何得虜侵如今未掃清渡漠將軍戰不歸塞山雲日慘無暉寧同義士埋沙磧忽與元戎解鐵衣萬里乾坤橫壯氣百年胡虜懾餘威只今海內皆揮涕更有何人馬上飛

姜籀

海內奇男子天東大丈夫平生玉龍劔戰死鐵關胡

萬乘嘉其義三綱賴以扶空餘嗚咽水怒氣徹雲

衢

鼓行西塞摠王臣血戰涇河復幾人報 國壯心填
碧海殺胡雄劔掩黃塵張巡已死知為厲先軫如生
却有神恨結九京天亦泣想應沙磧夏無春

楊萬古

驕虜爭誇拔漢旌遇君難撼岳家兵烏號迸落金犀
重龍劔雙摧鐵鷁精紫塞風雷猶怒吼青丘日月轉
分明陰山作地長河竭未泯將軍大樹名

朴安孝

沙場一戰後部曲幾人歸報 國身先死除兇計轉
非威風夷夏震壯節古今稀欲寫平生誅難禁淚滿
衣

一死人皆有如公死亦榮方期領忠武何遽失長城
天下聞忠烈兒童誦姓名回頭黑金路落日片雲橫

趙裕善

塞天回首陣雲頽痛哭將軍戰未迴恨入江波長咽
咽氣衝山嶽共冤冤凌霜大節輝千古烈日孤忠照
八垓殲賊壯心應不死肯教餘虜出龍堆

大漠匈奴拔漢旌擁兵元帥只偷生如無義死同

忠烈金
天將誰識忠勞在聖明塞草尚霑征戰血胡山猶帶
鼓聲聲新祠寂寞龍灣上長使華夷誦姓名

李植

紫電流星動朔暉孤軍絕漠救重圍先鋒決勝方乘
銳都轄偷生竟失機報主心懸關月照吞胡氣作
陣雲飛英魂定識祈連塚莫道沙場去不歸
一見恂恂罄素衷嫖姚方略不言功臨戎始覺無前
敵得士誰知在上公大漠風雲隨烈氣扶桑日月揭
孤忠千齡寂寞英雄恨壠上歌傳樂譜中

崔濩

丘山恩重此身輕義烈高懸日月明兩帥臨危皆惜
死一麾當敵獨捐生血添河水流還咽恨入邊雲鬱
不平知有忠魂猶作厲未應空返洛陽城

任興後

玄漠風沙鐵馬馳漢營旗卧鼓聲衰八千兵甲生降
日一箇男兒死節時終古山河留正氣祇今天地有
餘悲蕭條塞草龍灣上唯見行人墮淚碑

柳懿

二帥忘君尚忍言公能血戰黑龍原壯圖墮地天
應泣怒氣衝空晝欲昏萬古大名懸日月百年孤節

忠烈金
證乾坤沙場漠漠腥雲合何處招魂酹一尊

韓詠

將軍飲血戰涇河七尺能當八萬多猿臂奮揮飛赤
羽虎瞳雄視閃金戈睢陽壯節終難屈武穆英風竟
不磨勒石神圖嗟未樹九泉忠魄恨如何

申拭

躍馬從征統左營自期沙漠一揮清臨危肯作偷生
計賈勇唯知就死榮烈烈雄威掀宇宙堂堂忠義動
神明男兒事業當如此為吊英靈淚滿纓

裴大維

赳赳將軍絕代英特雲長膽勇鵬舉神力青陽中鼓
素心徇國出莅邊陲塞氛自解入領禁衛夙夜
匪懈蠢尔孽胡大邦為讎聖上西顧命公分憂建
牙宣州保障可倚烹鮮綏民枕戈勵士趁此簡書渡
瀘前驅直擣黃龍擬致天誅涇河日暮虜騎凌空
獨櫻兇鋒瞥眼猿虫奮挺大呼萬甲辟易强弩電激
血洒沙磧天地為愁犬羊褫魄弦絕倚柳空拳猶張
公如得援彼惡敢當痛矣元帥一羯奴耳叶謀逆降
擁兵越視梨花倏驚將星遽落氣化長虹義重泰嶽
華夏馳聲夷裔欽風其永有辭扶我大東昌洲江上

忠烈金
矢復可哀洛陽城下鄉夢倘來建廟眎袞錫爵申慰
君恩臣節宇宙元氣我念疆事無淚可揮九原難作
國將疇依鮑形已刻韋旄初飛慕切蟻羶跡阻牛岡
楚些題罷悠悠彼蒼

李敏求

芑茅曠職貢虵豕要鼎鼎敢思慧干紀妄擬禽填海
毒蠱蹈齊萬懷柔匪燕虺 帝怒赫威靈羣工贊神
綵武庫發鳴甲師門占動彩吾邦効前驅斧鉞戒勵
乃粵惟我飛將立事期磊磊嶽植鬱沈雄卓犖殊朋
案龍韜受黃石虎刀挫朱亥吹噓荷相公作人真樂

豈專城控額額冠玉光璀璨材高定遠班位歎度遼
采左廣掌初駕大敵勇彌倍先嘗萬拓羯實統千背
蒐塞塵滾白旆嚴霜凝素鎧凶屯聚任穰雜種紛鬼
僵通中箭沒羽柱頤劔粧欄連山殺氣黑絕漠軍聲
猥重圍勢如月白刃心獨在震迅禡游魂叱吒雙眞
宰士感血空沫虜愕汗方浼中權忽亾旃壯志終難
迨捐軀上將惜卸甲三軍怠途窮戰鼓死驂殪戎車
殆師燭矢垂橐冑落戈摧鏃穴胷雅不辭握節誓靡
改魂飄大樹陰骨斷邊沙確莽蒼藏碧墟遺悲足千
載恆居萬夫下亦受兒女給及乎挺節後猶山峯裒

忠烈金
畷怯者耳鳴竊却走亂脚腿公豈樂徒死進如賈爭
賄是知所自蓄配義曾不餒狼俗服英烈疾雷破礮
睥英靈御列缺上訢天應悔操弧射封狼手築鯨鯢
醞青楓夜關迴故國隨歸凱復夫古昌洲河流瀰北
滙像設泛楊舟神旗揚結芷部曲永嘯呼平原樂爽
塏廟貌佇崇成邃宇敞明闔肴盤具脩軟茶碗薦蓓
蕾刻形緬褒信買骨尚尊隗 恤孤旌羽林 隱卒
豐縑綵哀贈逮幽壤身名不相待淒涼四十誅烟若
珠綴琲吊古才子篇觀風太史採感激我何人落淚
重漼漼死惟丈夫能生為衆庶每嗟哉李少卿永負

通天罪

鄭廣敬

事去沙場白日悲死綏徇 國是男兒兵前勇略華
夷動身後聲名草木知褒典及泉崇八座榮光驚世
煥新祠多公偉烈昭天下能使東方永有辭

朴自凝

八尺身為萬里城宣川郡領左營兵草間乞命爭降
虜柳下摧鋒獨舍生氣作山河畱壯烈名懸日月振
英聲睢陽祠廟祈連塚解使忠臣淚滿纓

朴自興

只領三千士能垂萬古名
丁寧別時語終不負平生
朝鮮一偏將天下大忠臣
未掛徐君劍空教淚滿巾

聞愛余劍未能知之故第三句及之

李舜民

曾隨漢將渡江濱直欲天山
劍決雲軍令東西成敗
了人情去就死生分堂堂
義士忠臣節藉藉中華外
虜間愧殺李陵先解甲靡
然一萬似羊羣

權詒

分符志激三軍勇冒刃身同
一羽輕元帥望風先解
甲廟堂消日只談兵李陵
賣漢生何忍許遠酬唐死

亦榮壯魄千年終不昧
要看沙漠虜塵清

曹倬

豹韜猿臂早知名征虜遙從
驃騎營絕漠優期殲
鞬鞞庭直誓掃攬搶龍河未
渡心先決虎穴深揆命
已輕陰稜晝昏蒼暈惡寒沙
夕漲黑風寧將軍掣劍
天方吼壯士拖弓鼓不鳴殺
賊孤忠魂作厲擊胡餘
怒面如生山河氣帶雲煙慘
霄漢精懸日月明自是
天公非戰罪可憐身歿即功
成一時勝敗兵家事萬
古春秋信史評何幸彝倫昭
大義豈徒華裔聳遐聲
邊笳尚咽思鄉怨塞水空悲
別隴情毅魄忍教招舊

忠烈金
矢英靈謾說逐歸旌淒涼故牒龍驤號寂寞遺衣馬
鬣瑩陵律投降生亦愧顏張徇節死猶榮吊殤崇秩
紆恩典紀績開祠表血誠回首昌江雲漠漠老夫題
挽涕交橫

金玄成

背義皆生虜成仁獨殺身誠雖回白日吊不賴蒼旻
執矢招魂遠宣麻贈爵新豐碑何用勒汗簡照千春

朴鼎賢

庚辰嘉月二朝降己未殘春四日亾寶蓋山前胎節
義富車河畔立綱常生還未必先超擢死去方纔共

悼傷大樹休教說馮異將軍大樹夏流芳

有征誰料債 王師摧敵沙場獨死綏天下共知真
烈士海東爭說好男兒祈連故塚松楸慘汴水新祠
父老悲昨夜分明夢中見手持長劍淚雙垂

任器之

富車山下陣雲重虜勢憑陵已八衝不有將軍明節
義誰知藩國効朝宗援無馬邑天亡我力盡龍堆劍
折鋒萬古精靈張太守終能厲賊壯邊封

林棟

平生忠孝好男兒一戰捐軀報主知大樹雄風掀朔

忠死金
漠漠河殺氣慘旌旗圖開龐德行人泣說著延年壯
士悲未死英魂何處托鴨江嗚咽遶新祠

申垵

沙場征役幾人還說到將軍涕自潛力戰一身捐虎
口投降二帥忍奴顏精忠炳曜星辰上氣節乘陵宇
宙間未死壯魂應厲賊肯教戎馬近陰山

鄭碩儁

投戈解甲摠紛紛公獨輸忠死報君華夏共稱真
烈士蠻夷爭誦大將軍壯魂作厲清妖稜餘憤橫空
暗陣雲寂寞新祠臨鴨水怒濤中夜不堪聞

成汝學

虬鬚猿臂又長身身作偏裨渡鴨津自許孤忠惟殉
義終拚一死解成仁堂堂壯烈華夷伏磊磊聲名汗
竹新從此綱常歸武弁元戎誰道讀書人

誰向行間識呂蒙風神自是萬夫雄方知千古三綱
在賴得孤臣一死功氣作雷霆轟未洩名懸日月照
無窮刊碑立廟真餘事褒錫還膺帝渥隆

郭希泰

腰間誰佩虎符新子是尋常行伍人死敵曾聞儒者
事成仁今見武夫身霜寒始覺松筠性世亂方知節

義臣不有睢陽城陷日當時應不識張巡

李光春

毅魄難招鴨水濱東風歲歲柳條新人生倘有英雄
淚誰到宣城不滿巾

玄德升

烽照甘泉羽檄催犁庭須仗出羣才朔方健將徒身
手武穆孤軍只背嵬犀甲三千衝大漠擅裘百萬視
嬰孩鼓旗有主從他制刀尺雖存不自裁餘勁石梁
旅苦在獨憑繁弱綠弦開屠耆驚血流成漲裨小境
屍積作堆鶉首旄頭還閃爍狂風古月盡交回 王

人忼慨捐軀命閩帥投降樹領頰柱折可堪天北缺
戈揮無奈日西頰浮雲欲決蛟胎斷奔電將追駿骨
摧鄭滑忽傳陽瓚敗漢關寧見景升迴紫臙脂塞爲
雄鬼金痰藜沙寄夜臺枯柎嘯呼魂倘復熊魚取舍
死何哀猶啣白馬空鞍恨未舉黃龍痛飲杯寵贈恩
榮多雨露名聲夷夏殷霆雷行間誰識干城器終始
吹噓賴上台

張維

大漠煙塵白日黃將軍力盡死沙場忠魂定不羣猿
鶴厲鬼猶應殺犬羊四海英雄皆涕淚九重褒贈有

輝光傷心楚客江潭上湯把離騷弔國殤

壯志初將大漠吞死綏差足答君恩鼓衰矢盡三

軍歿兩濕天陰萬鬼冤聞道李陵猶屈膝可憐先軫

未歸元如今廟筭多遺患不為將軍早鑿門

朴瀾

重圍四面趨降聲鼓死旗顛接短兵舊業穿楊聊報

主獨身當賊已忘生沙場一斗英雄血汗竹千秋義

烈名只恨當季輕委任畫中龐德恨難平

李明漢

四海無雙士三韓有一人大名垂宇宙正氣作星辰

慷慨唯吾輩綱常獨爾身神兵應勦虜西去賀楓

宸

尹元舉

日落沙昏雷鼓聲漢兵深入近胡營旌旗未舉人先

變劔戟初交勢已傾士卒不聞南八死元戎欲效李

陵生當時若匪將軍烈誰信吾東禮義名

李基高

駢弓在手面如生柳下雄名萬古馨英魂應入淡河

水化作清波日夜鳴

萬里淡河水東馳日夜流英風吹不盡千載共悠悠

李敬輿

贈公胤伏波
令公益鍊

曾在 皇明萬曆四十六年先將軍死義之日適受
任下邑逃聞支撐宇宙之義烈激昂感歎至于隕涕
其時在朝薦紳之士莫不歌詠其事共岳武穆精忠
錄并傳于世不佞以不得列名編末為恨今者重得
罪 明時流配沃川郡時出鎮伏波將軍胤也銅柱
所在與瓊雷隔一帶水耳胤令公枉辱旌麾訪于窮
途中涸轍煦沫賴西江餘波之及其亦嗜義急困克
紹家聲者也伏波公納節還 朝不佞猶滯荊棘思
先將軍支撐宇宙之義烈多胤令公嗜義急困之厚

恩謹用杜工部八哀韻忘拙追賦以展前後之感
將軍為世出久戢凌雲翮鷗鵬困泥沙咫尺風濤隔
彎弧指天狼撫劍望寒磧斂跡行伍間含智甘退斥
不好匹夫勇誰知萬人敵既有曾萬甲何復身八尺
氣凌千尺虹楊穿百步鏑馳橫敬德稍羽没李廣石
宣城鎮敵喉彩增臨淮壁蓄勇日饗士遇敵期一擊
兵書通妙略豈待元凱癖平生畏革志始與單于適
六軍方東征玉帳將新易如山鳥卵塵似虎羣羊格
兵分西路進詔以東師益公將左營卒獨當前鋒逆
天威失震疊渡河鐵騎迫三軍若崩角總是元戎責

箕封禮義掃千載污簡冊慷慨是何人忠憤菀不釋
獨立射如雨虜血灑阡陌誓蘭矢未盡十里妖氛闢
都將子龍膽隻手狂瀾搯壯烈昭後世秋霜共浙癘
三綱賴不墜積雪餘秀麥若非張巡死幾爲讐人役
精忠九地埋義聲四海窄袞袞紆 皇眷恩榮及窀
穸寵贈大司馬佳咏遍詞客神明感忠丹邦誣得暴
白若論當時功詎下中興績青氈續後塵閩外樹旆
戟

尹善道

柳下將軍君莫說說來令我有餘哀尋祠一酌非無

酒未斫胡頭作飲盃

柳下雄風人謾說當時心事孰知哉肝塗尚握煌煌
刃骨朽猶存勃勃臆遺恨未殲降兩帥餘威擬擊虜
渠魁英靈定作天弧去不是山河不是雷

纍人昔在古楸城錦城鄭公鄭公名如麟莅其府鄭公高

義向我厚把臂華筵倒瓶甌飲酣往往憂國語語及
人才歷文武公言吾友有應河忠智義勇驅今古老
夫於人少所服每見金侯輒自失是歲金侯佐戎幕
問訊曾到幽人室詰其顏貌想見之矯首竚看干城
日豈知今日南天頭卷中慘愴瞻遺像一披戰圖一

揮涕再讀傳記再誓賴人皆榮子死得所我獨哀公
時不偶不識山川險易千里襲人百里趨 天將寡
謀何足咎獨揮踏繭偏師投界八萬鐵浮圖恨不先
斬元戎首玉帳當日二小豎望風解甲言之醜以公
之明料二帥與作褊裨豈其志始也曷不以死辭畢
竟投身徒死地要存東土禮義風要白吾 王報國
意我不愛公抵死倚柳射強胡我不愛公死後手中
劍不置我愛公嘗不卜貴家女我愛公嘗不媚黃門
使平生苟無利害心臨難何難義烈事若使如公制
閩外付與十萬豺貅任指揮李牧擊走凶奴不足道

李靖襲擒頡利其庶幾頭有韁繫脚索縻稟僞於麕
而虎衣使公不能成就萬古勳使公只能成就萬古
名天胡不嗇人才嗇人命思之中有百感千恨并嗚
呼後來豈無金應河後來豈無姜弘立嗚呼我有揀
選法欲叩天門我馬繫

李敏迪

皇帝新喪太原師最惜將軍獨死之萬里沙場無處
問三河鬻雨有餘悲楚烏欲集兵猶拒魯日將窮力
未麾大樹風飄聲怒吼妖精曉隕勢傾危雲中吊客
青蠅在江上招魂白羽遺漢法何多饒不死凶奴亦

自撫其屍故山莫起墳三尺殘骨應甘葬四夷幾向
賀蘭懷必滅竟令張悌報相知當時不識行間卒今
日誰奇胯下兒既感聖王旌且贈至蒙 天子寵而
容還嗟諸將孤恩後倘有如君受命時睢水廟前波
浪急青城門外夕陽遲英靈彷彿同來往香火淒涼
可逐追爲鬼凶胡知不遠他年持將月支卮

金昌協 忠祠 六首

白日松杉閉古祠靈風颯閃旌旗至今人說滾河
戰是處吾看宋老碑

漢虜相望列百營東韓壯士死分明千秋莫問黃沙

骨萬國同懸白日名

柳樹悲風戰後多魂隨復矢度關河祈連虛起嫖姚
塚壠上長悲壯士歌

長身通臂引雕弧匹馬陰山獨射胡安得丹青寫酣
戰傍邊更著一降奴

怒髮衝兜齒嚼齧龍泉在握死猶嗔睢陽厲鬼知何
似痛恨神州尚虜塵

崔瑩會聞起鐵城將軍後出更崢嶸千秋青史看功
罪莫把英雄一例評瑩與將軍皆鐵原人當明運
始終有他順效義之異故云

忠烈錄卷之七

詩文別錄舊錄匪人詩文雖不必抹去薰蕕亦不可同器故別錄於下以示褒鉞之義

序瞻爾撰

余嘗讀古史至忠臣烈士之死雖其人與骨皆已朽而莫不慷慨歎息扼腕墮淚况生同一世而親覩其事者乎余於金將軍之死也既為詩以挽之又作歌以哀之銘其碑則承主上之教序其錄則依首揆之言其發揮賁飾者亦勤矣觀其卷中燕頷虬鬚八尺長身奇偉倜儻有介冑不可犯之色者將軍之像也

忠烈錄
猛氣紛紜雄心四顧恢廓宇宙有萬夫莫敢當之威
者將軍之勇也身披金甲手控赤兔指揮川迴叱咤
山擘旗整鼓作士飽師直者遇賊而善陣也援絕淡
入事急重圍烏號月滿魚腸雷掣百發百中十盪十
決者對賊而樂死也獰風捲地驚沙蔽天執幟一人
奉矢一人冒鎬當鋒而投命者不忍去也砲火不放
兵刃不交或著綸巾或蒙皋比帖耳攢手而求活者
獨何心也箕服矢盡柳下劍折先軫之面如生常山
之髮自動金鏃猶集其身蒯綏尚在其拳羣胡避走
烏騭不近死有餘威鬼亦雄也龍灣靈宇龜背豐碑

藥公之玉匣初埋衛狄之鐵衣空掛雲凝叔勝之魂
濤起子胥之怒牲牢掩豆醴醖盈爵享其報祀神不
餒也嗚呼豈天意不助人謀不臧而致耶豈成敗有
數死生有命而然耶不能蹴鞞鞬之墟犁老上之庭
勒燕然之石者卽遺恨也不能雪喪師之恥問降賊
之罪斬俘囚之頭者卽孤憤也其與睢城力戰之許
遠滑臺抗節之陽瓚並立於百代之上乎其與烈火
焚如之都督危崖自投之遊擊同遊於九原之下乎
將爲雷霆而洩冤乎爲虹蜺而吐氣乎將爲厲鬼而
殺賊乎爲神兵而滅敵乎然則將軍雖屍暴沙塲血

忠及錄
深野草其精不斲其志不泯指圭璧而共貞掩縹緗
而罕匹人紀賴是而扶植士氣因是而增益天下稱
之而歆想四夷聞之而懼服禮義之邦果有其人忠
烈之名終副其實矣于時 皇朝嘉美特降褒賞主
上哀悼優知撫恤紀其績而贈其爵錄其子而官其
弟建祠廟而賜額遣禮官而致祭刻木葬形方茲非
寵羽林養兒比斯非恩吾王敵愾之誠於此彌彰昭
代獎忠之典至此尤盛矣是以搢紳起愴遠邇興感
安仁搗藻於汧督班固綴翰於馬叔一字孕涕聯篇
釀酸語其悲則易水波寒言其壯則隴上風號尸鄉

薤曲讓其哀音艾陵虞歌輟其苦響固將參之風雅
被諸管絃潤濯乎芳流輝爍乎耿光豈可與圍人之
誅賁父之誌同日語哉昔陽門之介夫死司城子罕
入哭之哀晉人之覘宋者謂不可伐孔子聞之亦有
善覘之歎今首揆朴公之於將軍其生也薦之其死
也惜之受其妻子而保恤之表其行跡而編輯之不
啻哭之哀而已則民皆悅服爭能親上而死長矣固
知胡奴之覘我國者必因首揆扶服之救而謂不可
伐也微相公則將軍之節義何以顯乎非將軍則相
公之識鑑何以著乎今年春余受僱接之任將迎詔

忠烈金
使于關西弭節宣城緬懷古蹟卽賦詩曰行經林畔
館却憶左將軍龜印今誰佩麟符昔獨分精忠懸日
月壯氣雜風雲祠宇當鐫石慙非幼婦文詩成朗吟
一遍遂倚壁引睡有一丈夫杖劍而來揖余而言曰
生有知己不易死有知己尤難爲謝足下高義余覺
而不見豈將軍之靈耶及到龍灣奠謁于將軍廟辦
香而退以報疇昔之夢也並記其事於序末云尔

跋韓續
男撰

淡河之役劉喬二公死於節弘立景瑞降于賊左營
將金公奮不顧身倡義大呼一軍爭死莫敢退比以

強弓快刃殪賊將斬虜衆者不知其幾矢盡劍折力
竭而死於柳下歷十餘日其面如生胡人皆歎曰此
眞將軍也遼薊之人語及我公輒嗚咽不忍言天
朝大官至請褒典于 皇上殿下特贈正卿立祠宇
錄用其子孫嗚呼生能捐其身死又享其榮君以義
臣以忠至矣盡矣夫忠者本自秉彝中出也子死於
父臣死於君無彼此之殊有同得之理雖降賊亦有
本心之天矣由其貪生畏死而失其天故甘心拜虜
而不恥然則有是性者必有正氣是氣也田橫得之
五百義士同日而死張巡許遠得之飲血裹瘡而死

於唐武穆得之背涅四字而忠於宋劉喬我公得之
同死王事列爲三忠而與日月爭光可謂通天地質
鬼神貫古今而無愧者也且公之忠豈徒然哉東方
自殷師受封以來素稱禮義之邦華人謂之小中華
非謂其衣冠文物之華如也禮樂法制之華如也直
以倫紀之明無異於華人也倫紀之明數千年來無
少欠缺而一朝爲二賊臣所覆墜賴我公扶植而全
之使天下之人知我國禮義之名小華之稱不虛而
有以警服狂虜之心則公之功於是乎大矣嗚呼公
之名垂於後世公之靈死而不泯其將轟雷霆而洩

其餘憤乎作山河而壯其邊圉乎抑爲厲鬼而殺其
賊乎上無負主知之明下不欺素蓄之心古之所謂
烈丈夫也是已

李爾瞻

人間阿童水中龍六韜八符羅心肖西隨 天將入
虜寨朱旗卓地當兇鋒楔揄磨牙吐饞涎飛廉大吼
驅腥煙魚麗忽拆月成暈積屍如山流血川赤驟白
駟俱失路獨携大膽倚古樹麾下呼吸三千人願爲
同死整部伍鷗翎長箭山桑弓一發五疊重圍空金
鞞抽盡寶匣動老蛟寒潭生紫虹十盪十決無敢前

忠烈錄
健若快鶻當風旋回看兩豎已解甲鼠拱狗舐還可
憐天柱將折地軸翻忠憤未洩愁雲昏今日尚矣歸
何黨生愛其膝死忘元紫髯擗色開生面綠眼胡酋
望自顛劈破宇宙今幾年鶻冠大節真罕見綱常萬
古賴不墜明白之死天下悲青霓扣額訴真宰干戈
未定胡奪斯雄姿肯變猿鶴形壯志應爲山嶽靈華
袞直筆事可紀龍文大鼎功宜銘聖主聞來痛在躬
天子下詔嘉介忠黃麻銀沫鳳窠濕縉雲卿月官
班崇衣冠首丘封若斧白骨沙場泣秋雨新祠俎豆
椒荔芳古篆黃絹伏玄武名齊馬耳高無極恨入鴨

綠流不息何當喚起不死魂夏領神兵滅此賊

從征自作萬夫雄轉戰期成第一功金篋盡時餘怒
在玉柁停處壯圖空榆中尚說將軍令柳下爭傳烈
士風勝敗兵家元不較誰知大節卽平戎

王師問罪下 天門飛將從征出塞垣踈勒自期傳
沸矢富車還見豎降幡玉龍埋土啣新恨赤兔嘶風
戀舊恩二帥偷生真得計九原何面謝忠魂

朴弘耆

車騎摧亾驃騎奔挺身猶欲答 天恩偏師轉鬪三
千里一劔終當八萬軍陵律有君還拜虜陳張無命

未吞元可憐寶蓋山前土埋却將軍不死魂
天驕猶夏戰塵昏義旅遙屯紫塞雲左校有人當一
面元戎無勇覆三軍至今虜血殷遺鏃終古陰山帶
恨氛欲吊忠魂定何處哀詞吟向大江濱

柳希奮

嶺西山水崇且淡蓋世雄豪稟於此八尺長身都是
膽人稱宇宙奇男子曾中磊落藏萬甲世上流輩徒
為尔陰山射虎邁飛將貫虱穿楊還小技近來孽胡
干 聖化 天子宵衣憂北鄙榆關新闢細柳營羽
檄旁徵滿萬士前茅重權屬之子將軍奮臂高歌起

提劍躍馬隨驃騎揚鞭一日行千里天山月窟眼底
平擬舉洪爐焚穴蟻陰風走沙殺氣昏十千 天兵
同日死將軍挺身冒白刃知有節義忘有己叱咤天
地風雷生八萬胡雛瞋目視弓彎滿月不虛發虜甲
紛紛倒槍壘奔波難以隻手障可惜長城從此毀鴻
毛輕處泰山重死綏初心終不二精忠凜凜動華夷
千載何人更相似犁庭雄略縱未伸猶使天驕魂盡
褫如虹氣槩柱海東華嶽終南與之比哀公之死淚
為零感公之心膝為跪邦家休養二百年今日捐軀
獨有是平生許 國一斗血化為隴頭東流水騷人

忠列錄
詩句太史筆美事風傳天下耳名高八座祠宇新
典一一垂明旨波豬江畔矢復罷哭望天涯如有埃
風悲大樹恨氣結恂怛英魂遼海涘塞月無晶片旄
歸故山愁雲滿桑梓霑襟不獨慷慨士巷哭都民亦
罷市表誌何煩三尺碑烈烈雄名響牙齒題詞莫爲
將軍悲萬古綱常賴不墜君不見兩帥衣冠拜賊庭
我欲不言言之恥

柳慶宗

血戰淡河漲虜塵將軍力盡竟捐身華夷從歎精忠
著聖主褒嘉恤典新江上壯魂來有日沙邊枯骨葬

無人朔雲愁慘滄波咽長使英雄淚滿巾

柳希發

西征將士幾千萬戰死沙場獨左營平素苟非知義
孰蒼黃何以捨生輕睢陽更見今南八河北重看後
杲卿猛氣英風傾大漠忠魂底處吊宣城

朴鼎吉

百尺淡河萬仞山只今沙磧血痕斑英魂且莫招江
上不滅凶奴定不還

鄭道

師行自恃百夫雄勢屈難成一戰功骨委胡沙心未

忠烈錄
死名齊 天將迹猶空要和未食降俘肉彰義爭稱
國士風異地精靈應不昧當爲厲鬼乃殲戎

柳忠立

山河間氣孕英雄馬革初心果有終取舍已分談笑
日重輕能別死生中捐軀只欲修臣職旌節寧期荷
聖衷遼水雲沈關月黑塞垣何處哭精忠

柳孝立

曾被蕭公國士名果然當敵快捐生堂堂大義天應
泣凜凜英風虜亦驚何處賈沙埋白骨可憐新渥煥
丹旌青楓關塞魂來否洒恥東人獨左營

鄭造

十萬 王師勢已傾將軍奮臂交兵援無蟻子重
圍急命若鴻毛一死輕貫日精忠夷夏見橫秋義烈
鬼神驚偷生義幕誰知辱 皇寵君恩尔獨榮
鳴劔曾從十萬征沙場深入殄胡兵除兇志銳非輕
敵報 國心堅不顧生屈膝戎庭寧可忍捐軀虎穴
獨爲貞詩圖千載能傳跡不愧三韓禮義名

李大燁

鐵關形勢挺豪英金井靈源孕昂精射虎將軍稱妙
藝落雕都尉擅雄名珠鈴玉帳威初振墨綬銅章政

夏平熒惑妖凶侵北極 鈞陳神筭赫西征前茅遙
向鞫鞮域細柳高開驃騎營唇齒共依投袂起毛皮
相托執爻行淡讐益勵 君臣義大德難忘父子情
何意庸奴皆作帥徒煩壯士亦提兵魚書忙寄成前
說龜篆重緘擬後迎副佐指揮超翼德偏軍節制邁
秦彭三冬曩露巡行伍二月流澌渡旆旌青海層波
鞭可斷黑山孤壘帶猶縈奉遵師律知奇正憑仗
皇靈誓掃清直擣龍堆森劔戟長驅虎穴壘饒鉅謀
金未禁通胡路烽火何由照 漢京鐵騎憑陵方坐
甲木牛阻絕遽呼庚擔當八萬非誇勇叱咤三千欲

決爭自分豹韜收異績那甘狗血乞同盟盱眙陣下
思臧質巡遠園中恨進明猿臂奮時金鏃散鴻毛擲
處玉鞘橫長城毀堞黃沙暗大樹摧柯赤日傾忍見
富車畱怨氣爭憐寶蓋返光晶羈鴻帶月招魂叫鞍
馬依風戀主鳴只許一身徇節死寧知二豎負恩生
不彰此子成仁志詎表吾王事 大誠葱嶺追 頌
隆 帝眷蘭綺陞秩賁邦榮葳蕤誰襲中郎筆褒美
都輸太史評石窳疏封 侈錫邑棣華推澤畀專城
丹青正煥龍灣廟冠劔空藏馬鬣瑩可率神兵功始
就應為厲鬼願還成隴山雲慘傳悲曲易水波寒咽

忠烈金
恨聲終古英雄肝欲裂紙今驕虜膽皆驚

李益燁

將軍若不死綱常應數絕見危輕軀命臨難奮忠烈
肯屈韓奩膝空斫杲卿舌賴有將軍死淑慝乃旌別
將軍若不死大義誰提挈虜穴繫降俘 帝京騰訛
說潘翰遭讒毀衣冠被污蠛賴有將軍死厚誣庶昭
雪將軍若不死正氣竟摧折雲飛叔勝魂濤起子胥
咽厲鬼當快報神兵可直截賴有將軍死此賊期剪
滅人孰不好生公能志自決人孰不爲臣公能誠自
竭名高兩曜懸土碧萬古血聖恩崇哀典 皇寵褒

壯節龍灣建靈宇龜背有新碣嗚呼金將軍於是人
中傑

鄭大海

塞風蕭颯鴨江寒招罷孤魂夕照殘壯略幾思擒頡
利雄心直欲斬樓闌輕身一節公餘事扶國三綱子
所安想得英靈應不死肯教胡醜恣兇頑

徐國楨

將軍轉戰入羶鄉虜箭如沙殺氣黃肯作李陵生負
漢還期許遠死酬唐堂堂大節輝千祀烈烈英名動
八荒矢復精魂何處托新瑩空掩舊衣裳

柳韓

吾君赫怒助 王師推轂西關簸大旗伐魏軍中雲
 作副征秦麾下籍為裨堂堂馬革裹屍志赳赳虎頭
 食肉姿直渡溪河江上駐橫衝化里部中馳啣鳴正
 欲吞夷落嘯咤期將殪月氏蟻子乏援仍射斃木牛
 無粟夏呼飢忠貞許國身奚惜勝敗關天力不支日
 沒沙邊胡騎滿風號樹下鼓聲衰張拳玉匣鋒摧後
 奮臂金鞞矢竭時先軫如生衝蝟髮雲長到死豎蚕
 眉山河壯氣雷霆怒日月高明宇宙垂今世杲卿真
 烈士後身南八好男兒魂歸故國一杯土蹟在空山

三尺碑北塞孤雲那忍望西湖遺曲不勝悲餘風千
 古死非死長夜九原知不知香火揭虔霞嶺廟牲牢
 明祀錦城祠聖君優恤絲綸煥 天子褒嘉雨露滋
 大節不緣無愧怍精忠那得感華夷從今鼎呂三韓
 重賴此綱常萬世持同赴戰場還屈膝噫他陵律一
 行屍

尹宏

落日陰山殺氣多龍沙何處是溪河念生一戰終無
 援名在燕然久不磨
 渡盡遼河擬履胡那知事去竟捐軀若無上相吹噓

力虛作朝鮮一武夫

祭戰亡將士文李燁撰

忠烈錄辛酉本所載光海君祭劉提督喬遊擊文并李爾瞻所製也然忠烈錄專編遼東伯事而天將則無與也故辛卯重修本刪之祭戰亡壯士文亦刪之然戰亡者并凌河部伍也一體并祀不宜偏闕故今者重刊復錄之而劉喬之祭文亦不可全沒故略記其事而將士祭文不當列書原編故附於別錄之末

忠貞効死固臣子之令名寇亂捭生乃邦家之恤典人謀不獲天道寧論惟茲建衛小會實是女真遺種兵已盈於萬數蟻垤雖依運方訖於百年梟巢當覆開七宗之惱恨吠日詬天合諸落之倔强陷城殺將

載輟舜干之格爰興周鉞之征貢七百之薄蹄庶追驥尾藉十千之瑣甲願雜鵝聲復父母之深讐汝承予意奮君臣之大義爾代某身獻馘報功宜述魯侯之職搯喉助快倘輸晉伯之誠采芑賦行燕忽棲於帷幕及瓜漆朔蟲亦處於鞬鞞絕塞風霜不耐刮肥之苦故國花柳何堪穿眼之望家戶蠲徭俾免流離之患妻孥分廩冀資養育之艱玉漏傳籌思枕戈以不寐瓊羞陳案念炊斗而發嘆赤羽彤弓豈稱情於蕃錫花駿蔥鑛聊寄想於遠勞師期卜日而遽臨軍令行雷以甚急稟戎機於督府三捷非難奉神筭於

忠烈金
軍門萬全是賴。奪名王之帳，破竹勢成。犁老上之庭，曳柴計迫。皇靈克振，直驅鞞鞞之墟。我武維揚，深入豺狼之窟。楚氛甚惡，旣愆象緯之徵。吳鐸忽哀，更失神明之助。繩橋糧絕，萬竈煙沉。踈勒援遲，三營色沮。猛將交綏，彎雕弧而奮力。勇夫投袂，蹈白刃而忘身。忍辱抱羞，詎作投圭之韓。奔喪師失屬，肯爲棄甲之華。元馬草裹屍，知壯心之素定。鴻毛殞命，覺義氣之益堅。再鼓而衰，膏川成浪。隻輪不返，丹薄爲林。部曲何尋，不復漢關之點。閱旌旗是逐，可憐瀘渡之精靈。城雉地崩，忍聽杞妻之哭。臺飴戰敗，慘看魯婦之

髮。水有回鄉，添別時之怨淚。山多望子，帶去日之苦顏。白草黃沙，孰焚錢於異域。腥雲毒霧，永委骨於古場。朔北將軍，應讓榆溪之壯節。隴西校尉，還慙毳幕之俘囚。贈爵褒庸，炳遺忠於國史。撫孤錄裔，行餘慶於家聲。式循燕吊之彝章，用慰楚殤之毅魄。龍盾豹纛，依稀西邁之軍容。鴨塞驢灘，髣髴東旋之行色。斷凱歌於渭水，牛酒誰迎。命哀誄於滑臺，椒漿遙奠。弔弓有禮情，豈異於幽明。復矢成行，義罔渝於存沒。彤闈避座，顧寡昧而省愆。粉署停筵，遣儒臣以致悼。雄圖不朽，張巡之厲賊可期。英烈猶存，魏顆之酬恩是

忠烈錄卷之八
效何嗟及矣尚忍言哉

忠烈錄卷之八

附錄御將公事

神道碑判中樞府事
龍州趙綱撰

公名應海字君瑞涇河之役手一大黃當浴鐵之騎
數十萬柳下將軍應河之弟也萬曆丙辰登武科
朝廷以其兄壯烈之故不次擢用所居官咸以廉
潔稱丙子亂元帥自點建請公為別將十二月翟
不窺正方直走漢京公帥御營軍三百名橫截賊
路與戰數十合勝否相當而我無後救敵來日滋
公決意倍城借一馬輒中虜箭而躡公徒步倚洞

仙巖彎弓而立有五賊繞出公前公射殺三人其中一賊叫躍用劍幾及公身公拔劍竟殺其賊然公氣竭不能着力賊乘之公自度不能脫乃拔劍自刎及賊退偏裨等覓公於亂屍中猶不瞑怒氣勃勃擔而入城用萬金良藥以救之考其袍甲九箭幾洞曾餘無鏃可入處噫兄死於深河弟生於洞仙一生一死雖殊而其誓心天地捨生取義則可謂難兄難弟矣顏平原以後千有餘載弟兄并節有幾人哉使吾東重於九鼎大呂誰之力耶丁丑八月除副摠管 朝廷始審大創之瘳也出爲

慶尚左水使俄遷右兵使辛巳拜平安兵使甲申陞統制使明年除御營大將兼捕盜大將其歲夏特命拜摠戎使辛卯自點獄起公名出賊口遂下理供辭樸直無半辭變爰書才上 上曰應海忠節不減乃兄者賊口誣也其釋之卽拜北兵使公之純忠於是乎益彰徹大鳴其後摠戎大將中樞之命連歲相銜至拜春川府使砥厲有加於前癸卯以副摠管上章乞骸骨 上不許繼以展掃先墓爲請遂歸鐵原蓋公意則以爲年踰七十國家少安舊臣不於此時歸休何待故一卧不顧其

忠及金
他公可謂賢遠乎人矣吾觀統制爲人口不能道
辨唯其忠實心益於面背丙午二月十五日無疾
而觀化卜窆先塋之側公系出安東上洛公之後
祖諱勅兵曹正郎考諱地四 贈參判娶虞侯善
山金忠老女萬曆戊子生公公生才六歲俱失兩
親惟兄弟相依以長公內子東州崔氏洛厚女生
一男一女男克鍊女適進士沈綵銘曰氣專而勇
沈樹惇而心欽欽惟其有是兮滿腔子赫然丹忠
不畏義死不榮幸生兮確乎介石之守上格蒼穹
佩符建節何處不用冰蘖兮其永垂光于樂石

墓誌銘大提學洪良浩撰

公諱應海字君瑞姓金氏遼東伯忠武公應河之弟
也萬曆己未 明師大勦于浹河忠武公力戰死
之彰大義於天下公當丙子難守正方城孤軍無
繼爲敵所乘自刎而不殊生死雖異均之爲尊王
殉國人比之顏平原兄弟金出安東高麗名將方
慶之後曾祖諱麟祥掌樂院正祖諱勅兵曹正郎
考諱地四 贈參判娶虞侯金忠老之女以萬曆
戊子生公早喪親與兄相依丙辰登武科拜宣傳
官轉都摠都事出爲熙川郡守先是忠武公以宣

忠列金
川助防將領兵赴涇河公慷慨請從忠武止之曰
兄弟俱死無益也及涇河敗公痛恨日夜腐心庚
申陞通政階拜江界府使朝廷以其兄故用之
以不次也甲子擢嘉善廉守富寧仁同定州皆以
廉潔稱丙子以元帥薦為別將守正方山城十二
月敵兵直走漢京公帥輕騎三百截大路與戰數
十合勝負相當公馬中箭而蹶徒步倚洞仙巖彎
弓而立射殺三人敵來益滋圍之數重公自度不
能脫大呼曰涇河之戰立柳下張目執弓死者乃
吾兄也今吾力盡不能殲汝何面目生報吾君

何面目死見吾兄也遂拔劍橫突敵陣所擊殺甚
衆仍自剄敵謂公死乃退偏裨尋公於亂屍中怒
目猶不瞑氣勃勃然擔入城用萬金良藥以救之
甲中九箭幾洞背公既甦而兵解丁丑八月除副
摠管授慶尚左水使尋遷右兵使辛巳擢捕盜大
將又出為黃海兵使移平安兵使裝送天朝通
使之船為賊臣李炆所訐與前監司鄭太和被逮
至鳳城禍將不測公從鄭公抗辭不屈事得已甲
申拜慶尚右兵使明年陞統制使又明年入拜御
營大將移摠戎使辛卯自點獄起公被誣引上

教曰應海兵敗自刎忠節不減乃兄賊口誣也
特釋之卽拜北兵使介胄之士咸感奮焉後又拜
摠戎使出爲春川府使既歸公歎曰吾年踰七十
官尊祿厚於分已足今國家少安可以告休矣遂
上章乞骸骨 上不許乃請省墓歸鐵原杜門謝
客課農以自給索綯以遣日優遊數年丙午二月
十五日無疾而終葬于先塋側負良之原夫人東
州崔氏將仕郎洛厚女舉一男克鍊早卒 贈參
判一女歸進士沈綵側室男碩鍊女長適進士鄭
就祥次適察訪李守敏克鍊男世章 贈判書世

彥 贈參判世翊摠戎使世章男長重九兵使有
子浚參奉洗統制使次重呂兵使有子潤統制使
世彥男長重元統制使有子洞早卒凖統制使次
重三兵使繼子淑府使摠戎男長重徽府使有子
滄御營大將次重一判官有子浣防禦使余觀公
初則戕身而志於殉國忠也終則辭官而全其晚
節勇也忠且勇不愧爲忠武之弟矣是宜銘銘曰
浚河之柳有虹薄日洞仙之石有劔飛血一死一
生二難雙節 王懋厥忠屢秉戎鉞國有干城皤
皤白髮尺疏歸田我志莫奪冥鴻增逝高風遐揭

忠列錄
後孫繩武山西世出鐵岡斬巖言埋其骨石有時
剝名不可滅

辛卯辭連逆獄 孝宗大王下教曰此應河之弟又

嘗與虜戰兵敗自刎必不負國即拜北兵使

義墻錄

辛巳公爲平安兵使以漢船裝送事爲賊臣李娃所

訐與前監司鄭公太和被逮至鳳凰城清人窮詰

不已禍將不測賴鄭公抗言自當事得已

陽坡日記

公少有遠志當遼東伯之赴淡河也公慷慨涕泣請
與偕行遼東伯力止之曰兄弟俱死無益托以家

事

家狀及臣錄

李有吉延安人青蓮判書後白之孫以永柔縣令從

淡河役倚樹射虜虜不敢近而其控弦之指盡墮

乃斷汗衫以指血書二月四日死五字繫之馬鬣

遂死之馬渡鴨江二日至家長嘯而絕仍以血衫

葬之馬亦葬於墓側後旌閭贈官配享於海南忠

武祠

以下同時殉節人事

李繼宗遂安君連松之後事父母以孝勇力絕倫又

能精通兵書人謂以將才戊午以雲山郡守當淡

河之役以衣服爪髮囊付家人曰此行吾不復還

以此物瘞之爲右管千摠及其對陣見李一元逃

忠烈金
走遂合餘卒赴左營慷慨謂曰我國於 皇朝有
服事之義且男兒死當裹革遂力戰與出身弟繼
賢同死俱贈官

吳稷海州人以都摠都事爲右營千摠從滾河役及
其 天兵盡殲與虜接戰左營將金公請右營協
力虜騎忽據兩陣間右營將李一元先遁稷發憤
獨領所部力戰伏劔死贈官

金堯卿金佐龍李高秀等以千摠戰死俱有旌贈
金雲以前訓練判官死於滾河之役有旌贈從征時
與子德建書曰余流寓以來惟宣川令監接待頗

厚常切感激之念矣今 天朝徵兵令監以助防
將隸於帥聞擇可與從征者余幸蒙不棄欲與之
俱士爲知己死顧何敢辭且令監忠節古今所罕
若未得捷勢必戰死余何有全還之理乎死生已
決固不足道惟汝年甫九歲零丁無依以此屑屑
耳嗚呼奴婢田土皆在後錄末題絕句以爲後日
面目詩曰千里從軍向玉關此身寧望再生還辭
家已絕妻孥念後事須將尺素看

手筆尚在
其後孫家

張繼先以部將戰死於滾河有旌贈國朝
寶鑑
金哲賢哲或
鐵宣川知印也公之渡遼哲賢與其母訣

語新娶妻曰有娠生子宜名曰偶迎遂至昌城公渡遼已久矣隻身追及戰時不離公側雙手奉矢意氣自若竟與同殉宣川邑誌

鄭奇男以前昌城府使與弟出身順男從淡河之役被擒不屈死并施旌贈當丁丙辰因大臣筵達追配奇男於宣川義烈祠

崔應海平壤人以前主簿淡河之役從公戰死有旌贈平壤邑誌下同

金德秀亦平壤人以前萬戶死於淡河旋間寧邊邑誌李命達寧邊人死於淡河之役旋間寧邊邑誌

金大璋大玲兄弟俱有膽略公置之幕府將赴淡河大玲謂其弟大鼎曰汝可留養父母弟為孝子兄為忠臣不亦可乎公大義之授劔偕行同殉柳下

宣川邑誌下同

桂汝扛膂力過人斫弛不羈里人憚之公北征募義勇見而奇之欲試其勇使環三重甲負鈛三斗步逐走馬但微汗而已以千摠同殉柳下時年十八車載重魁偉有識慮公愛重之淡河之戰以中軍從與弟禮重英重族弟位重致重及子敬良俱死

朴君山田仲立俱以壯士軍官淡河之役從公力戰

同時殉節

金乃雲義州土兵也公之渡遼以書記隸於麾下戰

死柳下忠孝烈錄下同

李萬生以砲隊哨官淡河役與公終始射賊十指朱

殷見公死乃自決

崔弼慶屬金景瑞陣中為左營千總射賊無數十指

皆血見公死遂自決

李慶田李義秋亦戰死慶田贈官

朱能邑誌以義州哨官隨公戰死贈官

朱士哲李時英并朔州人死於淡河之役給復邑誌下同

李雲植徐末文都德恆金義邦元洽金莫同崔漢龍

并安州人死於淡河俱旌閭

桂秀芳以萬戶與其二子黃盈從公戰死并旌閭秀

芳贈官

鄭思儉金國寬死於淡河思儉旌贈雙義錄及邑誌

趙英立以阿耳僉使初隸弘立軍見弘立投降遂奔

公陣中同死贈官海東忠義錄下同

林賢鎮川人父秀奎死於壬辰亂賢登武科淡河之

役隸公麾下常謂同伴曰吾父殉節暴骨沙場吾

豈畏死以忝所生乎卒與公同死三綱錄

田儉忠以勇略聞從公戰死宣川邑誌下同

崔熙允以兵房軍官戰死

王泰藍啓藍兄弟皆為幕下同時殉節

吳應斗及其弟鳳春戊午役俱入豪健之選從公力戰死敵

金汝霖年纔二十貌魁偉射命中淡河之役從公死敵贈官

崔二龍桂思逸金彥慶李達彬及軍人勇健李哲己等數十人皆幕下死節其時宣川軍士死者二百四十人云而其外隨行者多是忠義之人姓名不

盡錄

宋沆延昌君德榮之姪也以前所江僉使淡河之役為左營隊長從公力戰與從弟行同死於柳下延

邑誌

元倬才氣英邁淡河之役以前宣傳官隸弘立幕府見弘立投降遂提劍往助左營同時死節狀

鄭希哲以典牲署參奉從淡河役戰敗被擒不屈死

鐵山邑誌下同

李陽春淡河之役被擒不屈死於敵

李繼芳李承春皆寧邊人死於淡河之役誌

忠烈錄
崔永元武科防秋關西聞公出征遂往從戰死狀家
柳智傑晉州人公之女婿信傑之庶兄也年未弱冠
從軍入浚河抗義死之有旌贈

政

忠烈錄凡三刊始刊於光海辛酉訓練都監所刊也
再刊於金海府三刊於英廟辛卯金氏所刊也考
據漸詳記載益備然事例猶或未盡金氏以爲病今
我聖上褒尚節義迥出前古而於忠武益隆親
製祭文致祭者再忠武之烈於是益彰而適大中猥
承上命從諸公後編尊周錄至忠烈諸家首書柳
下之烈而金氏亦又改刊忠烈錄屬大中相其役公
私同是烈也事既不偶與亦有榮故謹與公祀孫宅
基公弟御將公諸孫魯瞻魯奎共爲之改編 列朝

忠烈錄
恩教編成一卷諸家記述亦多追錄附錄則依尊周錄所編書御將公正方之烈滾河同殉者並列於下而卷如舊錄加四十餘板而用舊板者亦幾半之嗟乎滾河之烈去今百七十有餘年矣然人盡若親觀婦孺下賤亦爲之感慨於邑而不能已如聽關壯繆岳武穆之烈也是錄則四刊而彌勤猶若有未盡書者將千百刊而不怠此秉彝之所共也豈獨金氏然哉况天章垂載炳若日星可以藉靈於千古耶是錄之重刊於是乎至矣遂爲之書

崇禎三丁巳日長至昌山成大中謹跋

此我六世伯祖遼東伯忠烈錄四刊之書而暨我六世祖御將公遺蹟之附編者也昔我孝宗大王嘗有教曰金某兵敗自刎忠節不減乃兄聖祖一言倚歟盛矣先輩亦有以滾河之節洞仙之役比於顏平原兄弟嗚呼精忠大節卓乎雙美實蹟遺徽未之合編者久爲吾宗之欠闕矣是錄始自天啓辛酉重刊而至三刊猶不無訛漏者讀者病之逮我聖上親綴宸章再命侑祭至若今年春之所紆恩於嗣孫宅基者已是曠絕之典而又下御製詩命揭東祠隆恩異渥愈往愈摯并宜亟付剞劂以

揚光榮於是二祖諸孫相與為謀四刊之役今幸得
成訛則釐之漏者補之又取御將公碑誌遺蹟并編
于左溪河死義諸公亦附於下昔所未遑今若有待
此實 聖主之賜豈獨吾門之幸也
崇禎二戊午孟夏從六世孫魯奎謹書

倚提龍為嘯
拔長劍提呼

吾園月亭風似天
歸江烟織舟如梭

金將軍

若使已及即水嘆
別時無淚是真情

